


*WIIWA, OSUWELA,  
WIRA VOOLIKANA  
NI MASU A MULUKU*

 Vano, ifiita iya, sa muthukumano ola voosiis'ula, khasintumihiwa, ti sa Ekereja paahi wala mutthu, okhala wira onihimmwa Mwiiixuttiho. Ni mmithukumamani wu, enniruuha manyakunyaku, okhala wira ti yoorika aili a hiyo wiiwanana voomalela, masi hiyo nihaana wiiwanana ni murima, khula enamuna. Masi eyo, hiyo mutapernakulu mu, ifiita iya, nyuwo mwaweha vale. . . Eyo ti y'axipatthani paahi, ni sikina.

<sup>2</sup> Vano nrowe nuurame muru okathi vakhani paahi wira nivekele. Akavi yaatthuna wuupuweliwa muuramme-ene muru? Ni ovenxa ntata paahi, mwiiraka, “Pwiya, miyo ki—miyo kintthuna etthu olelo, ni kinniphavela mahala Anyu,” etthu p'itthu.

<sup>3</sup> Tith'ihu a Wirimu, hiyo vano ninaattamela Ehice Anyu ya omoriwa ikharari, okhala wira noovekeliwa wira yeela. Ni hiyo nooleeliwa ni Mwan'Inyu, ni Moopoli ahu, wira hiyo noovekelani etthu mwa Nsina Nawe, naamuvahiwa. Tivo, Pwiya, nisuwelaka wira ninkhala mmuuttutthini mwa Orwa Wawe, ni vano neemenle-ene mmuuttutthini mwa omoriwa Wawe ikharari, vano hiyo naamuvekela, Pwiya, wira Nyuwo muthanle, ni Erooho Yoowaarya, itthu iyo sintthuneya hiyo ovekela. Ni hiyo ninnoona voosiis'ula, wira khiyaarowa okhala yoovirikana ni Masu Anyu wala exariya Anyu yuulupale, ni omoriwa Wanyu ikharari ni mahala, wira hiyo navekela wira hiyo nikhhalane othotoliwa w'omeekha olelo wa Erooho Yoowaarya. Wira Owo awerye orwa eriyari ahu ni olamula miyuupuwelo sa mmurimani mwahu, onuupululele hiyo mapuro ahu ooteettheya, ni ovonihe iretta sahu, ni olikaniha mirima sooriipiwa, ni owoopola ale oorimeela, ni waalokiherya atthu mwaha wa Orwa Wawe. Pwiya, mwiiwe mavekelo ala.

<sup>4</sup> Vano ninrowa osoma Masu Anyu. Ni—ni hiyo ninnivekela, Pwiya, wira mwa nisomi nahu na exikola ya Ttiminku voosiis'ula, Nyuwo muruuhe yoohimya ya yoosoma ni muupululele Yeeyo mmurimani mwahu. Okhala wira, hiyo nnoorwa va mwaha wa etthunelo emosa. Etthunelo eyo, emosa, woosuwelani Nyuwo oratteene. Hiyo nikhhanle aKristu, mwaha wo Waamini, ninthuna noosuwelani oratteene. Ale ahinakhale aKristu nlelo, anthuna woosuwelani Nyuwo ntoko Moopoli aya.

Ale anwereiwa, anthhuna woosuwelani Nyuwo ntoko Mpenuxa aya. Ni ninvekela wira ohikhale hata mmosa onikhuma mpaani mu, oohikhalanne etthu, masi wira khula yoovekela emaliheriwe voolikana, ni khula yoothhuna, ni khula—khula mutthu akhale ootteeleliwa murima, ni akhume mpaani mu, yiiraka, ntoko ale yaakhuma Emawusi, “Mirima sahu khisaaniviha, okathi Owo aalavulaawe ni hiyo mphironi?” Vano hiyo ninvekela yeela mwa Nsina na Yesu. Amen.

<sup>5</sup> Vano wa nyuwo muntthuna okhunla Eliivuru anyu. Voolimaleleya, kiroosuwela, wira mwa miteko sa onamalaleya, wira minuutu soophiyaka miloko miili wala miloko miraru sinniruuha ekhumelo yooreerela ya mutthaka wa erooho woohipisa, ni nuumala wiitthana wa waltaari. Masi ela ekhalaka exikola ya Ttiminku, miyo nkinthuna wira siiso voosiis’ula. Kinnnoona weettiheriwa okuxa okathi aka n’ulavula mwaha wa Masu.

<sup>6</sup> Vano, akhala mutthu oniisoona ohikhala saana, ohinreere oriiriwa, etthu emosa paahi murinaanyu wira o... Munn’aka, mulipa-ookhapelela, ori ottuli wa ekereja iwe, munvenxerye ntata paahi *siiso* ottuli iwe, yoowo, nto owo onoolokiherya oviha. Ni nintthuna wira mukhale ookhurunuwa murima ni woona oreera saana. Ni nwiriyane Masu, okhala wira ninniroromela Erooho Yoowaarya wira eniixuttihe Masu a Muluku. Ni munniwerya wiiwa saana, ottuli iwo? Mwaaweryaka vale, nvenxe matata, mwa—mwaaiwaka saana. Ti yooreera.

<sup>7</sup> Vano kintthuna mukhunle ni miyo, kookhalana yoosoma emosa elempwe va, ni Yoolempwa emosa. Vano kintthuna wira mukhunle ni miyo, toko, Eliivuru y’aRooma, aRooma, kapiitulu 9. Ni nintthuna nisome Yoolempwa ntoko nisomi, toko, mwa aRooma 9:11.

*(Vano aana awo ehinatthi oyariwa, hata ehinatthi wira etthu yooreera wala yoonanara, wira otthuna wa Muluku mwaha wo othanla okhale woomaliheriwa, woohikhala mwaha wa miteko, masi mwaha wa ole owiihanne;)*

*Aahileeliwa wira, Ole muulupale onoomurumeela ole mwamukhaani.*

*Ntoko silempwale-aya wira, Miyo koomphenta Yakope, nto kinamunyokha Esawu.*

<sup>8</sup> Muluku aacererye iparakha Sawe mwa osoma nno wa Yoolempwa. Nto vano wa yoosoma, wira kilipiherye nisomi naka, kintthuna kikuxe ela wa yoosoma: *Wiiwa, Osuwela, Wira Voolikana Ni Masu A Muluku*. Kitthuniheriwe otthikela-tho yeeyo. “Wiiwa, ni osuwela, vano nto wira voolikana ni Masu a Muluku.”

<sup>9</sup> Vano, hiyo noolimalela saana, hiyo atthu ninaavyaavya Soolempwa othana ni ohiyu, ni osoma ipaphelo sahu ni

owiiwa alipa-oohimya ihapari, wira olumwenku ola vano omphwanyaneya weettihwaka ni ikuru piili suulupale sa muroohoni. Ni soopiili ikuru sa etiini. Ni kookupali wira ikuru iya piili voohipisa sinoorowa okumulana. Ni ikuru soopiili iya suulupale saahooniheriwa mwa aana ala aili a Isakhi. Moota Muluku, mwa osuwela Wawe ohinimala, aanivahalyawe eruku ya itthu sothene khalayi-ru; wira mwa itthu seiya nisuwele, vekeekhai, erinaahu ohoolo. Aahikhaliha yoowooneya saana, wira Muluku ni Masu Awe, ni ephattu ni etuniya Awe, sirookhalihwa oratteene, wira hata na—natampi awerye woona wira yookhala etthu ehanle okhumelela. Muluku okhalinhe siiso. Khaavo orina nthyawelo.

<sup>10</sup> Vano, hiyo ninnoona mwa aana ala aili okathi awo, ehinatthi hata oyariwa, awo yaanwanasa. Onaamwi mai aya harusi... Okhala wira, owo aari harusi, Rebekah ooreera aatheliwe ni epyo ya xariya ya natiri a Muluku, Isakhi; aryeene alipa-oowaamini aili, oowivahererya wa Muluku, oosareya Erooho Muluku, ootthomeliwa khalayi ene othelana weiwo yaaphitaanihiwaya vamosa. Muluku aahisuwela khalayi-ene. Ni moota etthu ene yaakhanlyaya oviraka mwa maama owo, ni tiithi mmosa? Mmosa, mutthu mmosa ootakhala murima saana; ni mukina, mutthu mmosa ooreera murima saana; ni moota mutthu ooreera murima aakhalaawe ntoko ootakhala, ni ootakhala aakhalaawe ntoko ooreera murima.

<sup>11</sup> Vano eyo ti, kweekwe ennikhalka, kweekwe enookhala ethokiheryo ya Muluku. Muluku khokhanle orukunxaka mutthokiheryo Awe. Okhala wira, Owo onikhaliha mutthokiheryo Awe woolikana, okhala wira epantte ya Yoowo.

<sup>12</sup> Omatta wEdeni, etampi yaari yoophwaneliwa saana mpakha yaamuvanryaya murima Hawa mwa exariya, okela mutampini. Nto omatta wene weiwo waari-wo mwiri w'Ekumi, waahikhalawo-tho mwiri wa mookhwaani.

<sup>13</sup> Hiyo naarowa osuwela eyo olelo ntoko nlamulo na evirikanelo. Wira, vari yooreera, yookhala yootakhala; vari yooloka, yookhala yoovonyeya. Ni hiyo khaninkhalakhala, hata wira nipuro xeni varyaahu, khaninkhalakhala niweryaka wiitatha okhala ohoolo wa mmosa wa seiyo. Okhala wira, Paulo oohimya, "Miyo katthuna wira yooreera, vano yootakhala enkhalala vakhiviru." Natampi khonkhalakhala oweryaka wiihuluxa muKristu, muKristu wiihuluxa natampi. Kweekwe, onookhala namoona vo a ekeekhai, ni onamoona wa yoonanara. Nto nyuwo munoothanla. Muhaana okuxa epantte emosa wala ekina.

<sup>14</sup> Masi mwa aana ala aili, ti yootikiniha osuwela wira, awo ehinatthi oyariwa, oowaili a epyo emosaru, ya Isakhi, yoowo aari natiri. Vano, nisomi nahu ti noorakama vakhani, ni kintthuna kihelele mulipiheryo woophiyerya wira nwereye woona oratteene

etthu enlavulaaka. Ni mwaana oopacerya, aayariwe, aari Esawu; ninniphwanya wira kahi wira awo yaamunyakulihana paahi ni owana mmirimani mwa amey'aya, masi awo yaakhumme mwa yaawo, ewanasaka, Esawu aahikhuma, nto Yakope aavarelenle ekwakwino awe. Ni awo nlelo anoowanasa.

<sup>15</sup> Ni moota eyo, moota yaakhanlyaya orwaaka okhuma wa tiithi owo ni maama, oolokasa, oolikana, oothanliwa, oowaarya, oowiihahererya! Tivo eyo eri ntoko mulipiheryo, wira, Muluku oniihana ni othanla. Ehaana okhala. Voochicala ooreera murima xeeni atithi anyu ni amey'anyu yaari-aya, moota yaary'aya ooreera murima, aKristu xeeni atithi anyu ni ame anyu yaari-aya, eyo ti yawinyu nyuwo ntoko mutthu, mukhalelo anyu ohoolo wa Muluku. Nisomi nla ninniixuttiha yeeyo, wira awo oowaili aya, aana, hata jaarwaanse ni oothanliwa ni oowiihaniwa a Muluku, tiithi ni maama, muthiyana harusi ni mulopwana oowaarya, yaawo vookiserya yaaphiyenrye okhala wira mwa osuulu aya aarwiiye Kristu. Owo aayariwe ntoko mmosa mw'alipa-ookhwa. Owo aahehereriwa, atithi awe owo ahinatthi. Ni owo aahilaiherya, mwa epyo ela ya Isakhi, wira olumwenku wothene waamoopowa. Ni okhuma mulopwana ntoko owo, ni ephome awe yoolokaxa Muluku hata ahaatthunihenryawe wira aFilisti emukwannye maama, vaamanly'awe Abrahamu omuvaha yoowo. Muluku aahiruuhela ihasara etthoko awe, khwira, "Muri ntoko ookhwa," asukaka phome eyo yooloka. Ni Rebekah owo, naxariya, ooreera murima, oorummwa ni Muluku ni maama oowiihaniwa ni Muluku. Nto okhuma epyo eyo yoowaarya aahikhuma namakhootta ni mulipa-oowaamini. Munnona? Tivo eyo entthariha wiithana wa Muluku, othanla wa Muluku.

<sup>16</sup> "Ni ohinatthi hata mmosa a awo oyariwa, Muluku iirale, 'Kinnimpenta Yakope ni kinnimunyokha Esawu,' hata mmosa aya ohinayariwe." Tivo vaatthuneya hiyo woona sayi. Ole Muluku onlavulaawe ni yoowo ni omulattula wira arwe vameesa Vawe ni OwannyAwe, ni okhala mwan'awe mulopwana wala muthiyana, khiyaavo hat'etthu yuulupale siiso.

<sup>17</sup> Aximiravo ala aili, hiyo naweha vale mukhalelo aya, mmosa aya aari mutthu a erooho, owo aari Yakope. Ni mutthu a mw'erutthuni aari Esawu. Masi awo oowaili yaari anatiini. Ni yeeyo enniireyaka okathi wothene, a mw'erutthuni ni a erooho.

<sup>18</sup> Esawu aamuthoonerya mutthu a elapo ya vathi, a erutthu, oowuuramela etiini, masi oohitoko owerya. Khayaari mwa yoowo wira eyo. Owo khaawerya wira. Mwa yoowo khonakhaleke owerya wo owela ovikana itthu sa molumwenkuni, etthu y'erutthu.

<sup>19</sup> Masi, Yakope, yaari yookhweyaxa owo wira. Vano, Yakope, etthunelo emosa Yakope aarinaawe, yaari wira owo aaniphavela

ehaakhi y'eyuulupale eyo, voohicala moota xeeni aarowaawe ophwanya, vakhalaru wira aahiphwanya.

<sup>20</sup> Nto erooho eyo ya oyariwa iwo nlelo ennithikela ethoonyeriwaka molumwenkuni olelo, ni enoophiyerya okumana vano: mulipa-oowaamini a erooho; ni mutthu a mw'erutthuni, mulipa-oowaamini a mw'erutthuni. Khaavo aawerya ohimya wira oowaili khayaari anatiini. Yaari yaawo. Khayaahimya wira mmosa aamurumeela "amuluku eethiru" nto mukina "Muluku." Oowailia aya yaari arumeyi a Muluku.

<sup>21</sup> Vano, nwiriyane saana Soolempwa vano mwa mwah'ola, okhala wira kookupali wira onimookhaliheriyani. Munnona? Vano, "Kahi atthu othene aniira, 'Pwiya, Pwiya' anoorowa ovolowa, masi ole oniira sinthunaaya Atithi Aka ari Wirimu."

<sup>22</sup> Vano mwaweha vale, Yakope aahikhalana etthu emosa owo aathunaawe, okhala wira, voolikana ni Masu, iparakha ni e—etthu yooreera yaari mwa eyuulupale. Ni, Yakope, eyo yaari etthunelo awe emosa paahi, etthu emosa paahi owo aarinaawe mmuupuweloni waari "okuxa eyuulupale ele." Ni Esawu aahithanya. Ole tthiri aarina, aahithanya, wala aahuuleliwa muru. Masi Yakope aahitthuna voohicala moota xeeni aarowaawe ophwanya, owo aanitthuna.

<sup>23</sup> Ti siiso ni mulipa-oowaamini a muroohoni olelo. Owo khoncala moota xeeni munimutheyaanyu, moota xeeni muninyemulaanyu, otheiha xeeni orinaawe wiiraka wa muupuwelo w'erutthu. Etthunelo Awe emosa paahi eyuulupale. Owo onthuna ophiya wa Muluku, okhala wira eyo eniyariwa mwa yoowo. Owo khokhanle okhoottaka.

<sup>24</sup> *Yakope* enihimya "namatuphela" wala "namawoka." Masi vaamanlyawe ophwanya ni okela mookuxani wa eyuulupale, owo aahirukunxiwa. Eyo yaahirukunxa, ele y'erutthu. Vano owo nto aahiitthaniwa, Yakope, "mukhulupale n'Apwiya," yoowo aawanne ni Yaawo.

<sup>25</sup> Mulipa-oowaamini a erutthu olelo, "Oh, vakhalaru wira kinnirowa okereja ni wira ele eri yooreera, envirikana exeeni?" Nlo nikhuru na Esawu. Owo nlelo onnitheya ni onnithanya eyuulupale, Owo khoncaliwa ni yeeyo. Masi Yakope aahiphenta.

<sup>26</sup> Ni mulopwana a erooho olelo, ni muthiyana a erooho, othanliwe, ootthommwa a Muluku wira arwe mw'Ekumini Ehinimala, vakhala wira ahaana otumiha sothene arinasaaya, vakhala wira ahaana okumiha nsina naya mwa khula eliivuru ya mukereja mulaponi, awo mwa khula enamuna antthuna eyuulupale eyo. Eyo t'itthu emosa paahi entthuneya wa awo, "okuxa ehaakhi eyo y'eyuulupale paahi," ti yeeyo tu. Voohicala moota xeeni, mukhalelo xeeni awo arinaaya ophiyaka, vakhala wira ahaana okokhora waltaari ni wunla, bu-hu, vakhala wira ahaana otthimakasa ma—ma—mapuro ni otthika ni okhaliha itthu oratteene, n'utumiha etthu awo arinaaya, wala—wala

ovaha sothene sirinaaya ni okhala anawetta ni mmalapo, khivancala. Awo antthuna ehaakhi y'eyuulupale. Ti yeeyo tu awo ancaliwaaya, ehaakhi y'eyuulupale. Vano, muhiwootherye atthu awo. Awo khakhanle ohiiraka. Awo aroothomeliwa yeeyo, oothanleliwa yeeyo.

<sup>27</sup> Ni nto hiyo ninnoona wira ala aili, atthu a mw'erutthuni ni a muroohoni, ti siiso kweekwe yiiranyakaaya. Ti siiso eryaaya olelo. Kweekwe enkhalaka siiso.

<sup>28</sup> Kayini ni Apele. Omatta wEdeni, okathi Edeni epattuxiwaya, saahikhala miri miili wira mutthu athanle. Mmosa, owo aaphiyerya okhala wa akhili; mukina, owo aaphiyerya okhala Ekumi. Yaahikhala amiravo aili, Kayini ni Apeli, oowaili aya anatiini. Mmosa aya aatthuna Ekumi Ehinimala, vano owo aahinvaha Muluku, mwaha wo waamini, mukuttho wooreeraxa onvikana Kayini. Ethoonyeryo yoolikana ya ikereja olelo: ekereja y'erutthu, Ekereja ya erooho. Ni khivanihovereya wira kinlavula ni makhuru oomaili naanaano va, ni alakela ni efiita kinoolavula ni ikonto miloko sene a yaawo.

<sup>29</sup> Masi, nwehe, ekereja y'erutthu, ti ekereja ya mw'erutthuni paahi. Awo khanwerya ophiyerya etthu iyo yaamukhaani ya "Miyo kihitakaniha mukereja. Kaarowaka-ru okereja, kaairaka-ru vooreera sinweryaaka, ti yeeyo tu Muluku onthunaawe." Vano, eyo etthu emosaru Kayini iralyaawe. Owo aahirowa khumpaka altaari. Owo aahivaha mukuttho, aahiruwa mihokorokho sa mulaponi. Nto owo khwira, "Ela eri va, Muluku. Eyo ti yoomalela oreera erinaaka. Mukuxe wala muhiye." Ti siiso mulipa-oowaamini a mw'erutthuni sinaamini awe olelo. "Pwiya, miyo kinoorowa okereja. Kinimwiitakansa nikhuru nootepa oreera kikhanyaaka ophwanyaka. Kinooliva varinaaka mukereja. Kinimwiira eri yooreera. Vano, ela ti yoomalela oreera kinweryaaka wira. Kinookhaliherya omuthumela makhala naamukweli. Wala, kinimwaavaha anamwane yoowara." Sothene iyo siri saana, hat'etthu ya nthowa yo ohimyana yeeyo. "Masi ti yeeyo, ti yeeyo tu. Nyuwo mwatthuna vale, mukuxeke; Mwaahithune, khamurina okuxaka." Vano, owo ti mweettelo wa ekereja ya erutthu olelo.

<sup>30</sup> Masi Ekereja ya erooho! Apeli, mwaha wa muupululo, ni mahala, owo aahoono ovikana eyo, ni mwaha wo waamini owo aahinvaha Muluku mukuttho wooreeraxa onvikana Kayini. Ni yaahikhalela onamoona exariya awe, Muluku.

<sup>31</sup> Etthu emosaru yaahikhumelela ni Iximayeli ni Isakhi. Mmosa aari a erutthu, nto mukina aari a Erooho. Mmosa, a muthiyana epottha; mmosa, a muthiyana ootaphuwa.

<sup>32</sup> Yaahiiraneya etthu emosaru ni Isarayeli ni Mowabi, ikereja piili suulupale sikumanaka. Nto okathi Isarayeli aatthunaawe

orowa nipuro nawe na natiri, Ekereja ya erooho, atthu a Yakope, Isarayeli mphironi; Atthu a Esawu yaahikumana ni yaawo, Mowabi, ekereja yoowerya. Nto muhooleli muulupale a ekereja, Palaamu, aahirwa omutakhaliha munn'awe, masi owo aahiphwanya wira khaawerya omutakhalihaka munn'awe. Owo aahivonya, mwaha wo ohoona wa maitho awe, woona ethhokiheryo yoothommwa, ele, ni woona Masu a Muluku.

<sup>33</sup> Yoopacerya, “Waamini onrwa mwaha wo wiiwa, wiiwa Masu a Muluku.” Vano mulipa-oowaamini onniwa Yeeyo, onnisuwela, onniira voolikana ni Yeeyo. Mutthu a mw'erutthuni onimwiiwa Eyo, oruma Waya, masi nnakhala . . . *Wiiwa* enihimya “osuwela saana” Yeeyo. Oweha, onkhala oweha etthu; masi *woona*, ti “osuwela saana” yeeyo. “Mutthu aahiyariwe-ru vasya, khonwerya woona wala osuwela sana Omwene wa Muluku.”

<sup>34</sup> Vano, va onoorwa Isarayeli, ophiyaka ni natiri a Muluku, tthiri awo yaarowa muttethe wa natiri. Kahi atthu oohaamini, masi oowaamini, alipa-oomwaamini Muluku yoowo Isarayeli aarinaawe, yaakhumme wira ephavele omutakhaliha munn'aya, okhala wira owo aahimye wira munn'awe aari, vekeekhai yaari oohikhala a xariya okhala wira owo aahiira itthu sinci-ene saari soonanara. Masi, moone, owo aahivonya woona othanliwa.

<sup>35</sup> Etthu emosaru ni Esawu ni Yakope! Esawu aakhala ntoko mutthu ooreera murima. Owo aari a miruku ni aahiira itthu so omorela ikharari. Owo—owo aanaakhapelea athithi awe oowuuluvala ni ohoona, aanaaruuhela enama ya ethhove ni aanaakhapelela, ni aari mmiravo ooreera murima. Itthu sinci-ene s'erutthu alipa-oowaamini aniiraaya vootthariha etiini, makhuru a atthu ankhaliherya, ni—ni annaaliverya atthu muxipiritali, ni itthu sa etiini, masi kahi yeeyo enihimyaaka.

<sup>36</sup> Mowabi aari ooreera, nloko nuulupale, munn'awe. Ni Yakope aahiira sothene, owo aahikhala ootakhala murima; masi nnakhala vo owo aahikhalana etthu emosa yo ophwanya, waari omphwanya natiri ole, eyuulupale ele. Va aarwa Isarayeli, aana a Yakope, ni ethhunelo emosaru. Vano taai aarowa okhalana exariya?

<sup>37</sup> Palaamu aahaateka altaari athanu n'aili; wIsarayeli yaahikhala altaari athanu n'aili. Palaamu aahivaha mikuttho mithanu na miili s'axinama ooreerela; Isarayeli aahinvaha mikuttho mithanu na miili sa axinama ooreerela. Mwa yeeyo, yaakuxiwaka mwa niira, Mowabi aari natiini siiso ntoko Isarayeli saary'awe, Esawu natiini saana ntoko Yakope saary'awe, ni Kayini natiini saana ntoko Apeli saary'awe. Masi, entthuneya othanliwa.

<sup>38</sup> Ohoona xeeni! Ohoona xeeni wa aana a Esawu, naalavulaka mwa erooho, aMowabi, yaahaathanya atthu a Isarayeli khwira, “Nkaawehaseni. Awo kahiyo muromolelo. Awo nikhuru n'atthu ootakhala murima. Awo ankhala muheemani. Nto hiyo na elapo

yuulupale. Awo ahiira yootakhala. Ni awo kharina mutthenkeso eriyari aya. Awo anooviravira paahi, emuttharaka profeta.” Masi owo aahivonya woona Enowa y’Eporonse ni Mwala woomaniwa waarowa ohoolo waya. Owo aahivonya woona nikhuru nlo naaitthaneliwe okhuma, noothanliwa naatthara oruma wa eMuluku wa Muluku orowa muttette wa natiri.

<sup>39</sup> Ti siiso ery’aya olelo. Awo aniira, “Nlo nikhuru na masantu oophirikeya. Nlo nikhuru n’atthu akhanle *ela, ele, wala ekina.*” Masi awo annivonya woona wira awo antthara epantte ya Masu a Muluku.

<sup>40</sup> Isarayeli aari mphironi arowaka muttette wa natiri. Muluku, mwa Masu Awe, aahimmana natiri.

<sup>41</sup> Yakope, mwaha wa yeeyo owo aathanlale-awe ophwanya eyuulupale ele, mwa khula enamuna, owo aatthuna okuxa, okhala wira owo aanisuwela wira ehaakhi y’eyuulupale eyo yaahikhalana iparakha. Eyo yaahikhalana ekumi. Owo khaacala moota jaarwaaya, vakhala-ru wira aahikuxa. Eyo ti yaari etthu yuulupale. Mwa enamuna xeeni jaarwaaya, khivaacala. Owo aanitthuna. Ni aahaana okhalana. Ni aaphwanya. “Ooreeriwa t’ale anvoliwa etala ni ntthona mwaha w’exariya, awo anoovona.” Owo aari mphironi, ni aarowela yeeyo, ni aahaakhela.

<sup>42</sup> Isarayeli aari mphironi arowaka muttette wa natiri. Voohicala aMowabi akavi ni otakhaliha awo yaaphavelaaya waahelala, awo yaahirowa mpakha muttette wa natiri.

<sup>43</sup> Ni olelo nyuwo khamu...hata wira malamulo makavi awo ankhallanaaya, wootherya sayi, olupattha sayi, itthu kavi sootakhala awo anihimyaya, imaara kavi awo aniitthanaaya “santu-oophirikeya,” imaara kavi awo anihimyaya itthu iyo sootakhala, ekereja enoottthikela erowaka. Ehaana wira. Eyo enikhala mwa Masu a Muluku.

<sup>44</sup> Emaara emosa mamwene aili yaahithukumana. Mmosa aya aari Akhabi, ole ootakhala, mukina aya aari Yehoxafathi; Ekereja ya erooho, ekereja ya erutthu.

<sup>45</sup> Akhabi aari mulipa-oowaamini a mmukaanoni. Owo aahikhalana maprofeta. Awo khayaari oohaamini. Awo khayaari anamaakokhorela amuluku a ethiru. Awo yaari maprofeta a wIsarayeli, masi othene aya yaahixuttihiwa ni yaalyihiwa ni yaawarihiwa ni mwene Akhabi. Naahiphiyerya okhala ntoko nipuro awo jaarinaaya mulipiheryo aya wothene wa poliitka.

<sup>46</sup> Yehoxafati aahiphya, aphonyaka vale, khupaka waataana, yeeyo yaari yoovonyeya.

<sup>47</sup> Muhikhalakhale mwiitakanihaka ni alipa-oohaamini. Khanikhanle, mwa hata enamuna, ohelaka masina ahu muliivuruni mukereja sihinaamini Ehapari yooreera yoomalela. Nnakhala! Munimwiikelihaha mmukattiyamihoni.



48 Ni awo yahiikelihani mmukattyamihoni. Nto mulopwan'ola ooreera murima iirale, "Khivantthuneya waakoha Apwiya toko, wira nisuwele sinto nihaana orowa oRamoti w'oKileyati?"

49 Vano nkawehani moota mwaha owo waakhalaaya ntoko woolikana. "Hiyo n'axineene Ramoti w'oKileyati. Eyo ekhalanelo ahu, ni Asiiriya arookuxa wa Muluku mukumi. Hiyo khaninrowa okuxa muttethe ola?" Ni owo aahilavula oratteenexa, ni voottharihaxa malamulo, ni ya xariya saana, mpakha Yehoxafati okupali.

50 Ni, olelo, atthu anoowerya weemela vapulpitu ni akhili saana ni owerya wo olavula, ni esomelo, mpakha vakhanlyaya ovaanyihaka Owerya wa Erooho Yoowaarya mBibiliani. Awo anniwerya otaphulela ekhoottaka ovonihiwa wa Muluku. Awo anniwerya otaphulela olavula ilavulelo ni otaphuleliwa waya, awo anniwerya otaphulela opatiiso wa Erooho Yoowaarya, wira ti ya nihiku nikina.

51 Masi mutthu othanliwe ni Muluku, mutthu... "Ipwittipwitthi Saka sinnisuwela Nsu Naka." Nyuwo murineene othanla iwo wa Muluku mwa nyuwo, eyo khenkhalakhala yookwattulakani.

52 Yehoxafathi iirale, mwene naxariya iirale, "Khokhanle profeta, mwa yoowo okhanlyahu waakohaka Apwiya?" Akhabi aamurowa ahiirale.

53 Ti siiso ekereja ya erutthu eniiraaya olelo. Oh, awo aakhalanasa iseminaariyu soosareya alaleyi, atthu aalupale, anamasoma aalupale, anaakhili, oosuwela, oocencera, oh, wulu, oocencyaxa o—ovikana ekereja y'eru-...ahiiso, Ekereja ya erooho.

54 Mahiku a Nowe, mahiku ale, nkawehani ekereja y'erutthu. Awo yaari exeeni? Anasiyensiya, anamateka, atthu oosuwela. Masi ale oothanliwa, Enokhi ni Nowe, yaari amakampuusi ni alimi, oowiiyeviha, oohisoma, oohisuwela, masi yaanimusuwela Muluku aya; etthu mwa yaawo, yaaneetta, yiihanaka. Ninoophiyerya yeeyo nuuvira okathi vakhani.

Vano, nto Yehoxafathi khwira, "Khokhanle profeta?"

55 Oh, vekeekhai, ale eerutthu aakhalana. "Vekeekhai, hiyo nookhalana. Kookhalana eseminaariyu ohitto nno, oosareya yaawo."

56 Khwaaruuha imiya xexe. Vano, ala kahi oohaamini. Awo t'alipa-oomukokhorela Yehova Muluku. Khurwa, awo khwira, "Nrowe nikhallane okathi vakhani nto ninoolaleerya." Nto siiso othene aya khuthukumana. Vano awo khuhokolowa ni, "Masu a Apwiya," nto khwira, "SIISO ANIHIMYA T'APWIYA." Maprofeta a Isarayeli. "SIISO ANIHIMYA T'APWIYA. Welakani, Apwiya ari ni nyuwo. Ni munoomukuxa Ramoti-Kileyati, okhala wira ti wa Isarayeli." Ni mmosa w'axilopwana

aalupale khumpakela manyaka maili maalupale a yuuma, ntoko muthoonyeryo, nto owo khupacerya opurula. Owo khwira, “Ni yeela nyuwo munoomukumiha Isarayeli . . . ahiiso munimwaakumiha aSiriya oRamoti-Kileyati.”

Masi, Yehosafati, etthu emosa mwa yowo!

<sup>57</sup> Oh, kinroromela wira Muluku onimweettiherya ela mmurimani mwanyu. Kehiyo hat’etthu mukhanly’anyu wiisomihaka mmansinyu. Kehiyo hat’etthu mukhanly’anyu okelaka mwaha wo osoma. T’ile Muluku, mwaha w’othanla, oniwiirelaaweni nyuwo. “Kahi ole ontthyawa wala ole onooniherya . . . Ti Muluku onooniherya omoriwa ikharari.”

<sup>58</sup> Yehosafathi khwira, “Awo atthu oowara saana.” Vekeekhai owo aahihimya etthu ntoko ela, “Awo t’osuwela, ni atthu oosuwelaxa kitonko aka owiwa. Awo t’osoma mwa okathi. Mweemereryo aya mmosa. Awo aakhalana wiiraana wuulupale yaaworu. Ni awo t’osuwela, ni aakhalanasa Ekeekhai yinci-ene.”

<sup>59</sup> Yoovonyeya yothene yookhalana Ekeekhai. Wootha wuulupalexa waatonko ohimmwa waarina miloko mithanu na mixexe ni . . . [Nipuro vahiitthu mufiitani—Mol.] ipursentu sa Ekeekhai mwa yeeyo, wootha Satana aamuhimenry’awe Hawa.

<sup>60</sup> “Oh, yookhala Ekeekhai yinci-ene mwa etthu awo anihimyaaya, masi khokhanle-tho mukina?”

<sup>61</sup> Ahe, exeeni munuupuwelanyu wira mulopwan’ole aahihimya? “Nirine-ene imiya xexe va, wa ale oosuwelaxa, vooerelaxa? Awo kharisa mothakoni nno atthyawaka nno ni nno oohiwar’etthu nuusu, ni yivetikelenle-ene esapala ya epwittipwitthi, wala etthu. Awo axilopwana kaalyinhe aka, kaasomihalyaka. Awo kahi axilopwana ahimmusuwela ABC aya. Awo asomi, ni annisuwela etthu ene. Awo ankhala, othana n’uhiyu, esomaka isapala sa soolempwa ni s’eprofeta. Awo annisuwela ele eri yooreera. Miyo kookhalana oolikana. Ni awo yeemelanse ni ni mwiiwanano mmosa, imiya xexe a yaawo, yiiraka, ‘Welakani, Apwiya ari ni nyuwo.’”

<sup>62</sup> Masi vaakhanle wira kaaniwerya osoma muupuwelo wa Yehosafati minuutu vakhani, “Yookhala etthu ehinkhala ntoko yoolikana tu,” owo aamuhimya. “Yookhala etthu emosa paahi ehinkhala ntoko yoolikana. Khokhanle-tho mukina, nipuro nlo?”

<sup>63</sup> “Oh,” owo khwira, “ayo, ookhala-tho mmosa, masi owo khaniira mpantta wa mutthenkeso. Owo mutthu mmosa oovirikana. Owo t’otakhala murima paahi.” Owo ori ntoko Yakope. “Masi hiyo pooti omukoha. Eniriwa wira profeta. Masi kinnihoverya, okhala wira owo okathi wothene onookitakhaliha, ahimya wira *ela, ele*, wala *ekina*, ahiiso owo khonlaleeryaka s’eprofeta sooreera sa miyo.” Owo aakhanle wiiraka sayi? Munnona?

64 Vano awo khwira, “Nrowe nimurowele. Owo mwaana a Yimula.” Vano awo khurora khimuruuha.

65 Nto mutthu mmosa khumphwanya mphironi, khwira, “Vano, nyuwo muhimyeke etthu emosaru awo anihimy’aya. Muhaana wiiraana ni nikhuru. Vaahikhale siiso, mootakhaliwa nyuwo!”

66 Owo khwira, “Miyu kinrowa ohimya paahi ele Muluku onihelaawe mwaano mwaka wira kihimye, ni hata etthu ekina.”

67 Vano vamanlyaawe ophiya iwe, aahivahiwa ohiyu omosa, owo khwira, “Rowakani, masi koomoona Isarayeli omwaramwareya ntoko ipwittipwitthi shirina makampuusi.”

Nto Akhabi khwira, “Miyu nkooleenleni?”

68 Vano, aakhala imiya xexe animuvaanyiha mmosa. Imiya xexe ooxuttihiwa, oocencera, oosoma, axilopwana aakhili envirikanyaka mmosa oohisuwela etthu, ntoko naarowaahu omwiitthana, Mikaya. Mulopwana mmosa, masi nnakhala vo mulopwana owo aahikhalana Masu a Apwiya, eyo ti yaakhaliha evirikanelo. Khula mmosa wa ale aari oowootha, yaahooniherya okhala yooootha. Xeeni Mikaya aakhalenlyawe oovirikana? Owo aahaana okhala oohaawa, wira akhale oovirikana? Nnari. E . . . Exeeni yaamukhalinhe Mikaya oovirikana, owo aakhala ni Masu. Masu a Muluku ti yaawo owo aakhalaawe.

69 Vano yoolaiheriwa wira, mahiku ala, “Muluku onoomwaraxa Eroho Awe.” Yoolaiheriwa ni Daniyeli, wira, “Athu, mahiku nluku nimmanaaya elatarato munawoni, athu ammusuwela Muluku aya anoovara miteko suulupale.” Olaleeriwa seprofeta ettharaka olaleeriwa s’eprofeta! Ni iseminaariyu sothene, olumwenku, khasinwerya okumiha eyo. Muluku onoorowa wira, khula enamuna, ni athu anoorowa otthara. Munnona? A erutthu ni e . . . Ekereja y’erutthu ni ekereja ya Erimu. Moone, Masu t’ankhaliha evirikanelo.

70 Ti yeeyo Yakope uupuwenle-awe, “Ni khiyaavo encala, koosuwela wira nkikhanle oreerihwaka vahikhanle wira kinookuxa ehaakhi y’eyuulupale ele. Kihaana okuxa ehaakhi y’eyuulupale ele.”

71 Nto, masi Esawu aahithanya, ni an’awe anniira etthu emosaru, nlelo, nihiku nla. Awo annithanya. Kweekwe enkhalaka siiso.

72 Khula okathi onkhalaaya muhakalaliho, kweekwe onaakumiherya maphapo. Nlo nuulumo noolipa, masi ekeekhaii. Okathi yaayaranse aya Isakhi ni Rapeka, yaakumihenrye maphapo. Okathi olumwenku opattuxiwaaya, waakumihenrye maphapo, miri miili. Ni okathi Kayini ni Apele ayarasiwaaya, yaakumihenrye aili. Okathi Iximayeli ni Isakhi ayarasiwaaya, yaakumihenrye aili. Ni okathi Esawu ni Yakope ayarasiwaaya, yaakumihenrye aili. Mmosa aya, a erutthu (mmosa aya, a elapo ya vathi); mukina, a Erimu. Nto mmosa aaweha ya erutthu,

otthokelela; mukina eetta ni Erooho. Kweekwe enkhalaka siiso. Okathi ekereja Luteraana ekhumelenlyaya . . .

<sup>73</sup> Nrowe nimukuxe Pentekosite, toko. Nkawahani oyariwa wa Pentekosite. Aahiruuha muhakalaliho muulupale, Pentekosite. Khiwaavinre okathi munci-ene nuuvira Pentekosite mpakha Paulo saahimaly'awe, wira, "Yaamukhumelela axilopwana eriyari aya, ni itthu sootakhala, ni yaamwaakumiha atthu wa Muluku." Ni vekeekhai ti yeeyo awo yiiraly'aya. Enaakumiherya aili.

<sup>74</sup> Vayariwaaya ekereja Luteraana, Martinho Lutero aahiruuha muhakalaliho wa erooho. Khuwaavinre okathi munci-ene wira arwe Esawu, ottuli wawe, khutthokiha. Ni khwaakumiherya aili.

<sup>75</sup> Vano nuumala eyo, khurwa Metotista, John Wesley, muhakalaliho wa erooho. Nto nuumala, khurwa mutthenkeso, khutthokiha. Vano khwaakumiherya aili.

<sup>76</sup> Nto nuumala eyo, khurwa Pentekosite, muhakalaliho. Nto vano awo aathokiha, ni vano awo aniikhaliha mmutthenkesoni. Ni eyo enaakumiherya aili.

<sup>77</sup> Masi epyo ele ya erooho ya Muluku mukumi, enaamwi erina okhala nawetta, enaamwi erina okhala yooweetasa, kweekwe enruuha ovalaana. Esawu khaapinse okathi munci-ene ni Yakope. Jakope amalaka-ru ophwanya eyuulupale (avuwihiwe Muluku), eyo yaanithuna nvalaanyiho. Ni okathi mulopwana . . . Nkincala ekereja xeeni muniiraanyu mpantta, yakhala-ru ya erutthu, ni axirikha muneettanaanyu, atthu muntikhanaanyu iturufu, ni axirikha anyu a esomelo ni sikina; vammalanyu ophwanya eyuulupale, etthu iyo vale vathi mmurimani mwanu envoliwa etala ni Muluku, okathi munaakhelaanyu yeeyo, eyo eniithanela ovalaana. "Mukhume eriyari aya, ni mwiivalaanihe, onihimya Muluku." Ovalaana!

<sup>78</sup> Ekereja enookilaathi. Moone, khenwerya okelela ohoolo. Esawu aari ethoonyeryo yooreera ya mulipa-oowaamini a erutthu olelo, ohinaweryeke oxintta olumwenku. Owo khonxintta itthu sa molumwenkuni. Awo nlelo annaasivela meera, wiina waya, manikuure aya, wiipintari ni, athiyana, wiitho waya, ni—ni omettha maihi aya ni—ni owara ikuwo iya sikhaani soohifayi; ni—ni alopwana onaasivela orowa musaala mwa ipilyaare, ni—ni waavura asikaro, ni ohimya iperwa soonanara; nave nlelo wiira mpantta wa ekereja. Awo khankhalakhala aweryaka oxintta itthu iyo. Nnakhala Esawu khaawenrye. Masi nnakhala vo, wira akhale natiini, owo aahaana okhala vathi va muupuwelo w'akhili. Eyo etthu emosaru ekereja eniiraaya olelo. "Hiyo ninookhala mutthenkeso. Hiyo ninootakanxana. Ninoopaka nihimo, wala nikhuru, wala etthu siiso."

79 Nto ti siiso ekereja eneettaaya olelo, ya erooho ni ya erutthu, sinrowa vamosaru. Eyo kherukununwe, ni khenkhalakhala erukunuwaka.

80 Owaarya wa Muluku. Muluku, aryeene Muluku, onniiriha yeeyo, Mmansawe. Ahaakhanle natampi, khiyaarowa okhala . . . Owo khaakhalakhala akhalaka Moopoli. Masi Owo aari Moopoli wopaceryani, tivo khiyaakhanle hata etthu yaarimeenle. Ni mikhalelo Sawe Sene so okhala Moopoli, aahimukhaliha natampi, yaahaana okhala etthu wira yoopoliwe. Ehinatthi okhala etthu yoowoopoliwa, yaahaana okhala etthu yaarimeenle. Ni exariya Awe ni owaarya Wawe! Ahaatonko okhala mu—mutthu onwereiwa, Owo khaakhalakhala akhalaka mpenuxa. Masi okhuma wopaceryani, ni wa wopaceryani, Owo aari ohinatthi wopaceryani. Owo aari mpenuxa. Tivo khiyaakhanle hat'etthu yaawereiwa, tivo eyo khimukhaliha mutthu onwereiwa, wira Owo aavonihe, wira emukhalihe Owo mpenuxa.

81 Wa Mukhalelo yoowo Woowaarya okhumme woopowa, waahikhuma otakhaliwa. Mwa maama mmosa ni tiithi yaamuruuhale Yakope, yaahimuruuha Esawu. Munnona? Ti Muluku. Owo khokhanle orukunxaka mutthokiheryo Awe. Awo ahaana orwa mwa inamuna sothene. Ephattu yothene enoolikana ni yeeyo. Ehaana. Munniwa enihimy'aka? Enookela olukama muhina. Ohaana okhala mutthu onrimeela, wira oopoliwe. Nto ahaakhanle, Owo, Awawe . . . Owo aryeene Moopoli ohiira eyo. Yoowiixerya enniitthana Yoowiixerya.

82 Ntoko mwammiravo kinimuhimyakaaka kweekwe, amukhuuraka mphira mmalaapini, ni ipetaale sa mucinka, owo onnitthuna esoofiri. Vakhalaru wira yaahikhala muhina mme yaaphavela esoofiri, yaahaana okhala esoofiri nipuro nlo, toko, yoopakiwa. Yaahaana okha esoofiri owo ohinatthi okhalana otthuna iwo. Ni eyo, esoofiri, yaahimukumiherya owo, vano owo khutthikela esoofiri.

83 Siiso Muluku ti Moopoli. Ni yaahaana okhala etthu yaarimeenle, wira Owo oopole, wira emukhalihe Owo Moopoli. Ti yeeyo tu eyo eniiraaya, enimooniherya Muluku. Ithtu sothene, sothene siri mwa Yoowo; kahi mwa mulaleyi, kahi mukereja, kahi mmutthenkesoni, masi mwa Muluku, wira othanla okhale wooloka voomalela. Munnona? Eri mwa Yoowo. Ayo. Luteraano . . .

84 Vano nto hiyo ninnoona ovalaana okina, owo aari Abrahamu ni Lothi. Awo yaari axinna. Masi Lothi aari a muupuwelo w'erutthu. Owo kweekwe aarowela etthu yuulupale, etthu yaarina eweero yoowotha mwa yeeyo. Eri ntoko khole, ntoko sihimalyaka, kweekwe otthunaka etthu yoowaarya. Erooho eyo khiyaahiyale atthu, olelo. Awo anrowela e . . . Anoorowa opooma, ni awo khanrowa orwa nipuro nikhaani ntoko nla. Munnona?

Awo antthuna ekereja yuulupalexa mpooma, pastore oomalela osoma, weiwo anrowa atthu oowara saana, weiwo mukhulupale a munisiipiyu onrowaawe-wo, opooma. Nlelo erooho yeele ya Esawu. Vekeekhai yaahikhalana ihaakhi s'eyuulupale, opacerya wene, wiisihana Ekereja, masi yaahaapweteya okhala wira annithanya. Nyuwo khimukhanle owiirihaka atthu awo okokhra, ni wunla ni omuxonttela Muluku, n'ukhuma n'ukhalana muteko wo ovonihana, ni ovilela olupatthiwa wa molumwenkuni, waakhela Erooho Yoowaarya. Ni awo—awo khanrowa wira eyo. Awo anoothanya. Awo aniiythana “nikhuru na masantu oophirikeya.” Vekeekhai yeeyo Bibilia ohimmyawe wira yaamwiira. Awo anniira okhala wira owo ti mukhalelo aya. Ti mukhalelo. Ntoko nakhuku ni epompa, mikhalelo miili. Annitthuna eyo okhala wira ti yeeyo awo akhanlyaya. Awo khankhalakhala yiiraka, nnakhala, omoona mukina, okhala wira khayariwe wira yoone eyo.

<sup>85</sup> Nto mukina, khimukhanle omususihaka mwa yeeyo, okhala wira p'uthanla wa Muluku. Owo oniyariwa wira akhale mulopwana a erooho wala muthiyana a erooho. Etthu emosa mwa yoowo enniitthana. Oh, miyo—miyo kinroromela wira ela enookela vathi nipuro vanweryaahu, nyuwo mukhanlyanyu woonaka etthu miyo—miyo enihimyaaka, ni kimalihaka vano. Vano Abrahamu. . .

<sup>86</sup> Muupuwele, okathi yaakhalaaya oopatthana ekereja y'erutthu ni Ekereja ya erooho, awo khanaakheleke eparakha. Yakope khaareerihiwe mpakha owo ovalaana ni Esawu. Ni Abrahamu khaareerihiwe mpakha owo ovalaana ni Lothi.

<sup>87</sup> Lothi aahikhalana mithukumano sawe sikhaani sa mavekelo mukereja mwawe iwe, aanaaxuttiha an'awe alopwana n'athiyana, ni akina. Masi owo aakhala makhalelo ooreera, mpakha, vapacenryawe olavula mwaha w'okathi wa wookiseryani, awo khunamutheya.

<sup>88</sup> Etthu emosaru olelo! Nyuwo munoolavula sa ovonihana wa Muluku ni owerya wa Muluku, ni sikina, awo anootheya eyo. Eyo erooho emosaru. Iyo irooho piili suulupale, seiyo mwa etiini, sinvaraka olumwenku; mulipa-oowaamini ni mulipa-oohaamini, mulipa-oowaamini ni oowiipaka waamini, mmosa amutakihaka mukina. Vano okathi Abrahamu iivalaaninhe awe. . .

<sup>89</sup> Moowehe? Yesu, alavulaka mwaha wo Orwa, Orwa, wa neili, Owo iirale, “Ntoko saaryaya mahiku a Nowe, awo anrowa olyaaka, owurya, othelana, ni othelihana.” Masi okathi Owo olavunly'awe sa mahiku a Lothi, Owo khaahimye hat'etthu ya yeeyo. “Ntoko mahiku a Lothi,” eyo ti ya muupululo.

<sup>90</sup> Nkawehani etthu yaakhumelenle mahiku a Lothi. Aahikhala Lothi ohitto iwe oSotoma, oowiitthyaala saana, mwa akhili, aahiphiyerya okhala owo, mmosa a axilopwana aalupale a

mpooma, mphuki, aakilaathi vamukhora ni waaphuka atthu. Amwaar'awe yiira mpantta wa maloko othene yaakhanle a mpooma. Ni an'awe axithiyana, ni othene aya, yaathelanne eriyari ya atthu oosuweliwa, a akhili, oosoma saana, oosuwela, a miruku. Nto Abrahamu aakhala muheemani vathi va mwiri karvalyo. Masi nihiku nimoso oowaili aya yaahithotoliwa.

<sup>91</sup> Ni aahikhala mulaleyi mmosa oosoma aaronwe khulaleerya, ni khuwiitthana wira akhume. Nkawehani mu—nkawehani mutthaka, “Mukhume,” owo khumwiirela Lothi.

<sup>92</sup> Ni khaarowa wiitthaneliwa okhuma wahaakhanle mwaha wo omoreliwa ikharari wa Abrahamu. Iirale, “Kaaphwanya atthu miloko mithanu, Nyuwo munimwiinanela? Kawerya waaphwanya atthu miloko miraru? Kawerya...Kaaphwanya muloko?” Owo aahirowa ottaiwene. Ni Owo khaawenrye hata waaphwanya muloko eriyari aya.

<sup>93</sup> Khivanxankiha, “Ntoko saary'aya mahiku a Nowe.” Muupuwele, Nowe khaari ethoonyeryo ya Ekereja; Enokhi taari, yoowo ahaavinre moohaawani, masi aahikuxiwa ohaawa ohinatthi opacerya. Enokhi aahirowa Owaani, owo khaavinre moohaawani. Nowe aahivira.

<sup>94</sup> Vano, nwehe oratteene vano ninthunaahu ohimya ela. Nwehe enamuna xeeni ya ethoonyeryo Abrahamu ni etthoko awe yaakhenlanse-aya. Awo yaahaakhelasa ya Erimu. “Abrahamu!” Owo aasuwenle sayi wira aari Abrahamu? “Amwaar'inyu ari vayi, Saara?” Owo aasuwenle sayi wira aahithela, wala aahikhalana mwaar'awe, Saara?

“Awo yaarisa muheemani.”

<sup>95</sup> Vano, Mulopwana mmosa okilaanthe-ene vale, akhuuraka enama, awuryaka eleethi, ni akhuuraka mukatthe wa nakhuwo, “Amwaar'inyu ari vayi, Saara?” Owo aasuwenle sayi etthu iyo? Owo aasuwenle sayi? Nkuupuwelani yeeyo. Nyuwo munimwiinana...Nyuwo atthu a muroohoni, muhiye ela ekele mwa nyuwo. Owo aasuwenle sayi yeeyo, okathi Owo oniiraawe ntoko mmalapo, ntthupi mukuwoni Mwawe?

Ni okathi Abrahamu iiraly'awe, “Awo ari muheemani, ottuli Wanyu.”

<sup>96</sup> Nto Owo khwira, “Miyo kinrowa o...” “Miyo, Miyo,” epronome ya mutthu. “Miyo,” Mulopwan'ola, Muluku aisuwelihaka Mmansawe mw'erutthuni. Muluku! Abrahamu aamwiitthanne Elohim. “Miyo, Miyo kinrowa woothotolani. Miyo kinrowa ommaliherya natiri Aka. Ni voothariha okathi wa ekumi, miyo kinoorowa woothotolani, ni munoorowa okhalana mwaana ola Miyo koochimenryakani.” Nto Abrahamu, emiya; Saara, miloko mithanu na mixexe.

<sup>97</sup> Ni Saara, ottuli muheemani; ntoko xexe sa iheema sikhaani, eheema yuulupale yaari wiithela. Owo aaiwa, wiithela wa

iheema. Owo aamwiiwa. Nto mmurimani owo aahitheya, khwira, “Miyo, muthiyana oowuuluvala a miyaakha emiya, ni apwiya aka,” iy’awe, “apwiya aka, ni oowuuluvala, ni wuupuwela wira naamurowa okhalana opuha-tho vamosa, ntoko atthu amiravo oothelana? Oh, vanweryaneya sayi?” Ni owo ntoko aatheyale.

<sup>98</sup> Owo aarenrye ettuli Awe eheema. Owo khwira, “Awo atheyenle-ni?” Oh, munna, eyo vo!

<sup>99</sup> Nkawehani ekereja y’erutthu yaakhelaka olaleiwa wa Ehapari yooreera. Billy Graham a vano n’ale iwe alaleyaka Ehapari yooreera, “Mukhume-mo!” Masi awo yaahikhuma? Nnari. Vakhaani, vakhaanixa, vakhaanixa.

<sup>100</sup> Nkawehani nikhuru n’Abrahamu, oowiitthaneliwa okhuma. Vano nwehe. Nto Owo aahinvaha ethoonyeryo ela, ni owo aahimwaamini. Vano Owo aahilakaseya ohoolo wawe, khuruwa. Oh, moota kweekwe enikhalakaaya ovalaana, wiitthaneliwa okhuma!

<sup>101</sup> Vano, irooho iya piili. Wira kaakuve ni nyuwo, wira kaakuve vano wira kiphaye nipuro naka kintthunaaka wira moone. Makhuru ala maili annitakanxana vamosa, moovirani w’okathi wothene, okhuma wopaceryani wene wa okathi, ekereja y’erutthu, Ekereja ya erooho. Awo anrwa okhuma Waataana Wa Khalayi, mwa Waataana Wa Naanaano, ni nlelo annikhala mpakha olelo.

<sup>102</sup> Vano, mwa miyaakha soophiyaka ikonto piili sivinre, soophiyerya okumana, ni sihooleliwe ni axilopwana aili: mmosa aya, Yesu Kristu; mukina, Yuta Iskariyoti. Vano, Yesu aahiphitaanya Orwa, Orwa Wawe waneeli, wira irooho iya piili saamukhala soovirikana saana ovikana saary’aya iwe. Vano va ti vatthu kintthunaaka wira nware sawinyu—ikuwo sanyu sa Ovuwa. Irooho iya piili sinoorowa okhala soovirikana. Okhala wira, Satana aahirwa khukhala mwa mutthu aari mempuru a mukereja, Yuta Iskariyoti, aakhala mukereja ya mw’erutthuni, ni aari mpatthani a ekereja okathi wothene. Masi owo aahikela ni—ni khoototha, wala oona wira owo aammoototha munn’awe. Owo aahirwa khootererya okhala mmosa a yaawo; khulawiha ithu sooreera sa Muluku, khukelela ohoolo mwa Erooho, akhalaka wira ti yoowo, aahikhuma khulaleya Ehapari yooreera, ni khuwoomola axetwani. Masi vathi mwa yoowo, okathi wothene, owo aari Yuta, opacerya wene. Bibilia ohimye wira, “Owo aayariwe mwaana a moopweteyani.”

<sup>103</sup> Vano muupuwele, yookhala ekereja y’erutthu ottuli iwe, Esawu, aFarisi ni aSatukhi.

<sup>104</sup> Masi nkanweheni mutth’ula onuupuwela paahi e...Owo onoorowa ni Mutthaka okathi vakhani, masi khontthuna wiikelihaxa mwa Yoowo. Munnoona irooho iyo? Yesu ohimye wira, “Sinrowa okhala soolattana ni etthu y’eekekhai, sinrowaaya owoototha ale Oothanliwa,” Oothanliwa, nyuwo



mwaweha vale, “vaakhanle wira vaaniweryaneya.” Masi khivanweryaneya. Moone, eyo enoowoototha.

<sup>105</sup> Vano nwehe, kahi ekereja paahi ya mw’erutthuni, ele eri ota, ekereja y’erutthu ya mahiku othene, nikhuru na Esawu.

<sup>106</sup> Nihaana vano nikhuru na Yuta, nikhanle noowootothaxa, noowootothaxa, niphiyaka olukama mmatatani mwa eparakha. ntoko siryaaya mwa aHeperi 6 ni 10, moota owo ohimmyawe, “Atonko wira mpantte ni alawinhe owerya w’olumwenku onoorwa, ni yiirale itthu iya sothene; vakhala wira . . . vano nto vakhala wira awo ahaakhela osuwela wa Ekeekhai, vano nto awo yakhoota-ru.” “vootthuna,” exeeni iyo? “Okhaliha Ephome yo waataana, yeeyo awo areerihaniwaya, okhala etthu yoonanara.”

<sup>107</sup> Mukihiye koovaheni eyooniheryo. Ela eri va. Va ori mulopwana mmosa, owo mutthu ooreera murima, mmiravo ooreerela. Ohiitthaniwa, owo onnoona mmurimani mwawe wira onttthuna okhala murumeyi. Vaareera, owo onimukupali Yesu okhala Moopoli awe. Owo mmiravo ooreera murima, khaavo onwerya omuhimyana etthu ya nthowa. Nuuvira okathi vakhani, mwaha wa oreerihwa. Mulopwan’owo onnaakhalela ithaama aawehaka athiyana. Owo . . . Eri mwa yoowo. Munnona? Vano nto, etthu enttharelana, khino owo aaninvura sikaro, ni onnitthuna onvura. Khino onnitthuna omweetta cuuku. Khino owo onnitthuna wira etthu yoonanara. Owo onnisuwela wira khaarina wiiraka yeeyo, tivo owo onihimya wira, “O Muluku, mukihelele Ephome ya Yesu, ni mukireerihe.”

<sup>108</sup> Nto owo onimwaakhela oreerihwa. Owo onniwerya okhuwela, waattottopela Apwiya, wira itthu kamosa-kamosa, nave, okhuma ni wira etthu. Muupuwele, Yesu ohimmye wira awo yaamukhala weuwe nihiku nenlo. “Anci-ene animoorwa yiire, ‘Pwiya, miyo nkilaleenrye s’eprofeta, nkilaleiye? Nkiwoomonle axetwani, mwa Nsina Nanyu?” Yesu ohimmye wira, “Miyo nkinatoko hata woosuwelani, nyuwo muniira sootakhala.” Moone, awo ari vo.

<sup>109</sup> Vano nwehe ela vano. Hiyo nimphiyerya epantte ya emiya ya emilyawu ya maihi, olukama wene voorereni wowiitha wa Ehapari yooreera, “Ti yowiithaxa onvikana xoowa oniitha nno ni nno, onthikila mpakha mmakhuvani, ni Ennilamula!” Aleluya! Muluku, mutthuniherye ekele. “Ennilamula sowluupuwela sa mmuruni.” Eyo ti Ehapari yooreera, Owerya wa Muluku. Masu a Muluku owooniheriwa ti Ehapari yooreera.

Nyuwo muniira, “Bibilia oohimya. Awo—awo Masu a Muluku.”

<sup>110</sup> Ahe, Masu owooniheriwa ti Ehapari yooreera. Ehapari yooreera enirweenle kahi Masu paahi, masi ni owerya ni wooniherya wa Erooho Yoowaarya, wooniherya Owerya, okhaliha Ehapari yooreera ekumi.

111 Okathi waarowaly'aka oHintiya, pixipu muulupale a—a ekereja Metotista aarimoorwa, khwira, “Mwenye Branham, hiyo khaninthuna osuwela etthu enimuhimya murummwa. Hiyo ninnisuwelaxa sa Bibilia ovikana sothene munrowaanyu okhalakhala musuwelaka.” Khwira, “Hiyo naari ekereja, ni khwiikhaliha mu iyaakha ikonto piili nyuwo muhinatthi okhala nloko.” Ti yeeyo. Masi khwira, “Hiyo ninniiwa wira Muluku ohoothotolani ni ooruha yoovaha enwerya omukhalaha Bibilia ola mukumi.” Khwira, “Ti yeeyo ennicala hiyo.” Oh, wulu! Moone, mulopwan'ole aari mwaana, kahi musulu, ntoko Davidi sihimmyawe. Munnona? “Hiyo ninthuna nisuwele. Eyo ekeekhai?”

112 Miyo khwira, “Tthiri, eyo ekeekhai. ‘Yesu Kristu mmosaru nsana, olelo, ni mahiku othene.’”

113 Vano, nkanweheni, ekereja y'erutthu enlupattha Ekereja ya erooho. Vano, ninnoona nto wira Yuta aipakaka okhala munna mmosa, munna, vano nto khuthukumanyeya vookiserya khuphiya v'ethokani.

114 Vano nkanweheni mulaleyi ola mmiravo. Owo oniphiyerya nipuro, oniiraawe, “Pwiya, miyo kinnaawehaka athiyana. Nkaakhanle wiiraka yeeyo. Miyo kinnikhalaka, moosuwela, kiiraka itthu sa molumwenkuni. Nkaakhanle wiiraka yeeyo. Kinnihononaka musurukhu aka mowiikaranani mwa ikhavalu. Miyo—miyo nkaakhanle wiiraka yeeyo. Miyo—miyo kinnirowaka khula ohiyu woona ifiilime. Nkaakhanle wiiraka yeeyo. Sinnikisivela hata ilaratarato soohifayi ni itthu siiso, kookhalana ipaphelo soonanara okatthi waka. Nkaakhanle wiiraka yeeyo. Iyo itthu sa molumwenkuni. Mukireerihe, Pwiya!”

115 Nto Apwiya khwira, “Vaareera, kinimwiira.” Awo anoohelala Ephome ya Yesu Kristu ni omureeriha.

116 Vano, vaniiraawe siiso, ohiyu umosa owo onoovira oniiwa etthu. Owo onoorowa khuwiryana. Owo onniwa sa opatiiso wa Erooho Yoowaarya, osariha wa Erooho. Vano owo onoowerya woona, “Oh, wulu, kahi yooreeraha! Masi, mwiiwe, eyo yaamuhonona muteko aka kaalaleiye-ru yeeyo. Eyo yaamwaatthyawiha amaama owaani. Kaamukumihiwa mukereja mwaka kaaphiyenrye-ru okela mwa yeeyo. Oh, vanreerela kisuse eyo. Masi kinoophavelaxa saana. Ayo, eyo Ekeekhai, Bibilia.”

117 Ahe, ntoko murumeyi mmosa oosuweliwa, oosuweliwa mulaponi mothene, aaphwanyiwe naanaano (ni mulopwana mmosa aari ni miyo oPorto Rico) okokhonre, alavulaka ilavulelo, oLontre, Inklateera; mutthu ooweryaxa, mmosa wa anamalaleya aalupalexa mulaponi olelo. Nto mulopwan'ola, munn'awe aari ni miyo va, mutthu oosareya Erooho, khimutthimakela khwira, “Oh, munna, ti yeeyo!”

118 Owo khwira, “Miyu koosuwela. Miyu koosuwela. Masi, nwehe, mukihye kooleleni etthu.”

119 Owo khwira, “Mulaleye vano. Mulaleye. Ola p’ukathi. Ni ovara wanyu murima, mwaamuwerya ottikinya olumwenku.”

120 Owo khwira, “Nnari, nkikhanle olaleyaka. Moone, e—ekereja yaamukikhootta. Nkaakhanle olaleyaka eyo. Nkaakhanle wiiraka.” Oh, munna!

121 “Amon-...atonko oreerhiwa ni awenle wira yaakhele osuwela w’Ekeekhai, aaweha Yeeyo, ahoona wira Eyo ekeekhai; nto khurukunuwa, woonaka wira annimukhomela-tho Mwaana a Muluku, ni omuulihhi muru Owo vaatthuni, yuuleliwaka muru Ehapari yooreera.”

122 Paulo ohimnye wira, “Nkinuuleliwa muru Ehapari yooreera ya Yesu Kristu, okhala wira Eyo Owerya wa Muluku onoopola.” Ti Owerya wa Muluku ovaraka muteko eriyari ya Ekereja Awe.

123 Masi awo khwira, “Nkaakhanle wiiraka eyo.” Mulopwan’ola khwira, “Awo yaamupuwela wira ka mupentekosite. Awo yaamukikhalihali...” Owo khwira, “Wulu—nttittimiho aka waamuhononeya.” Oh, munna!

124 Miyu nkirina nttittimiho. Kinuupuwela Wawawe. Nttittimiho Awe, ti Yoowo.

125 Masi moone moota akhanlyaya okhuveelaka Yeeyo, moosuwela, “Ni okhalihali Ephome yo waataana yeeyo owo oreerihaniwaawe, etthu emureerinhe ni khumukumiha molumwenkuni, ni khuphavela ompweha owo Va. Vano nto owo onooweha Yeeyo, ni onoosuwela Eyo. Orerya etuli Yeeyo, khuuvo-tho mukuttho mukina wa itampi,” ohimnye Bibilia, “masi olipelela olamuliwa ni mooro onvarela onrowa, onrowa, ompwetexa nwanani. ‘Maana wunla ikuhu ti wawaka,’ anihimya t’Apwiya. Ole aathanya ikano sa Moise, aakhwa voohimoreliwa ikharari, mwaha ni namoona aili wala araru. Yootepaxa ehukumu, ni ehukumu yuulupale, enrowa wiirihhiwa, murumeyi onyakenle Ephome ya Yesu Kristu vathi va inawu sawe, omanle-ene waakhela osuwela w’Ekeekhai, ni khukhalihali etthu yoonanara.” Whish!

126 Munnoona vatthu vary’ahu? Yesu ohimnye wira, “Phoole.” Munnoona moota Yuta aary’awe? Owo aari ni yaawo. Owo aari Esawu, aakhalihhiwe muulupalexa a okathi ula. Owo aari namawoka, namatakiherya, aakhalihhiwe muulupale a okathi ula. Va owo aahihalela ophiya-wo, emaara ekina, munna a Yesu, munna oowoothererya. Masi mmurimani mwawe, owo aari ni ekereja ya khalayi y’erutthu okathi wothene, okhala wira ti weiwo owo aamutuminhaawe-wo Yesu. Owo aamutumihale Yesu, ihaakhi sawe s’eyuulupale, vekeekhai ntoko Esawu siiraly’awe mwaha wa muhasa a mushusi. Owo aahitumiha ihaakhi sawe s’eyuulupale ni musurukhu miloko miraru w’eparatha.

127 Alopwana anci-ene ni athiyana olelo aatumihya eyuulupale aya ya muroohoni mwaha wo osuweliwa vakhani, etthu ekhaani ya molumwenkuni ahinxintakaaya; etthu ekhaani, athiyana, wiisoottiha itthu wiitho ni omettha maihi, owara ikuwo sookhuveya; alopwana, mwaha wa iperwa soonanara ni waavura asikaro, etthu ya molumwenkuni. “Mwaaphentaka olumwenku wala itthu sa molumwenkuni, ophenta wa Muluku khokhanle mwa nyuwo,” ohimmye Bibilia.

128 Nkinthuna woosikulihani, masi niri woomalelani. Ninoophiya, ninwela exikatta naakuvaka vano.

129 Munnoona moota eryaya? Awo anniira. Awo arootthomeliwa. Awo pooti otakiha n’ukhala oosivela ni oowiiyeviha, oolattana saana, ni aKristu, soolattanexa saarowaaya owoototha ale Oothanliwa; masi ni mhokorokho saya munimwaasuwela.

130 Muthiyana ommuwara kaputtula, khonkhala ntoko muKristu, wa miyo. Bibilia ohimmye wira, “Ti y’etampi ni yoowuuliha muru muthiyana omettha maihi awe.” Muthiyana mmosa paahi mBibiliani aatonko opintari wiitho wawe, aari Yesapeli.

131 Ankhi alopwana, nyuwo alopwana antthuneya wira mukhaleke aKristu, nave munaahiya axaar’inyu wira siiso? Okathi, Muluku onimookhalihani oowaakhula yeeyo! Khamuhiyo mulopwana! A erutthu! “Oh, miyo kinookhuma nto ni kinimwiitakaiha ekerej’ela.” [Nipuro vahiitthu mufiitani—Mol.] “. . .nyuwo munuupuwela yeeyo.” Eyo vekeekhai t’ile Yoolempwa ehimmyaaya wira yaamwiira, ni vekeekhai ti yeeyo awo yiiralyaaya. Ni ti yeeyo awo anrowaaya wira, wiisakaleliha!

132 Ookhala mutthu iirale, “Billy, mwaahihiye-ru eyo, munimwaatthyawiha atthu othene.”

133 Yookhala Etthu emosa ehinrowa okhuma, Erooho Yoowaarya, okhala wira Awo Masu Awe. Ni mulipa-oowaamini eekeekhai ootthommwa khonrowa, okhala wira Eyo Yolya ya munepa awe. Owo onniphenta Yeeyo. Khiivo etthu enwerya omsusiha Yeeyo. Owo onimwiira etthu, ntoko Yakope, masi owo onthuna ehaakhi yeeyo y’eyuulupale. Owo onookhala vaavale. Khenikicala sinto onthuneya khula mpatthani owo orinaawe, waatthuneyaka muteko awe, vaatthuneyaka omempuru awe wa mukereja, vaatthuneyaka sothene. Owo onoothikela avarelenle yeeyo, okhala wira khokhanle osyakaka. Yookhala etthu mwa yoowo, enimweettiha, yowiixerya yiiitthanaka Yowiixerya. Oh, eyo eri vo, etthu mwa yoowo!

134 Nkawehani, khula etthu entthunaanyu ophwanya mBibiliani, mukuxe okhuma va, mutthikele mwa Maphattuwelo noone nipuro eyo etothonlyaya moone vammalelaaya. Irooho sothene ni iyeettelo olelo sipacenrye mwa Maphattuwelo. Ti yeeyo hiyo eniiraahu wira niwooniheryeni itthu iya munooanaanyu, apatthani. Muhiliyale eyo. Muhihye eyo

woovirani vamuru. Muhiye ekele muhina mwa nyuwo. Iyo itthu sa Muluku. Eyo yoophiya wookumanani; Yesu aahihimya khalayi ene wira yaamphiya wookumanani mahiku ookiserya, ni yaarowa okhala wa yeela: Ekanyeryo ya Muluku, ni ekanyeryo ya nxeni; ikuru piili sa erooho sinvara muteko vamosa.

<sup>135</sup> Vano, khula mutthu onnisuwela wira Ekanyeryo ya Muluku ti ehakhi ya eyuulupale, opatiiso wa Erooho Yoowaarya. aEfeso 4:30, annihimya, “Muhiriipihe murima Erooho Yoowaarya ya Muluku, yeeyo mutthittiwaanyu ekanyeryo mpakha nihiku no woopoliwa wanyu.” Okathi awo ayariwaaya vasya, awo yaahisareya Erooho Yoowaarya. Erooho Yoowaarya ti Oyariwa vasya, hiyo noosuwela eyo. Nyuwo mwa—nyuwo muyariwe ni Erooho, miyo kinookupali iyo. Masi mpakha muyariwe!

<sup>136</sup> Mwana onrupaliwa mmirimani mw’ame awe, orina muthinto mmosa w’ekumi. Eyo ekumi, ni ekhaani aya . . . irukuruku sikhaani mw’erutthuni mwawe sinnirukunuwa ni sinnivotha ni otupha *siiso*. Masi okathi oniyariwaawe, ookhalana e . . . [Munna Branham onopa ikuphwi—Mol.] *siiso*, vano nto owo onoonyakula, onophiyerya okhala munepa mukumi.

<sup>137</sup> Ni mwaana onoowerya orowa okereja ni wira, “Oh, kinaamini ekereja. Miyo—miyo kinoorowa, kinimwiira *ela*. Ni ka ooreera murima . . . Miyo kinnitthuna wira sooreera, kinnitthuna wira sooreera.” Masi nintthuneya nlaathuma na Ehapari yooreera wira envenxe, wira anyakule wa Ekumi Ehinimala; nto Erooho Yoowaarya enookhuwela mwa yoowo, ntoko Eyo ehinatoko aya okhuwela khalayi. Vano eyo yoopattuxiwa esya, eniyariwa ni Erooho. Vano onoopacerya wunnuwa, weetta, ni okhalana okhala wawe mwa Muluku; moone, vekeekhai ntoko mwaana, mwaana a erutthu, orina okhala wawe molumwenkuni.

<sup>138</sup> Vano empa ela ya vathi va yakurumuwa vale, nookhalana ekina ennilipelela, moone. Vekeekhai ntoko erutthu y’ephattu yaapakeya aya, yookhala erutthu y’erooho wira yaakhele okathi eyo ekhumme aya mw’ame awe. Ni okathi enikhumaaya mw’ame awe, elapo, okhalaka wira, ori mmirimani mwaya vano, yiipulelaka, yinlaka, (O Muluku!), yiipulelaka, mmumutekoni wo oyara, yuuluvalaka, ni eretta, n’itthu sothene sihaaxaka, ni erooho muhina mwaya ephavelaka muttetthe epantte ekina ya muro. Enimwiipulela, enyokolowaka, etuphaka, (ayo, mulopwana) okhala wira yookhala ekumi mme enkhalah mahiku othene. Eri mw’erutthuni erina okhwa. Ni mwa okathi owo, *siiso* ntoko maama onimukumihaawe mwaana eephattu, ni erutthu ya erooho khumwaakhela; elapo enookumiha, ni erutthu ya ephattu enoomora, ni erutthu . . . ahiiso erutthu ya wirimu enoovara eyo iwe. Emp’ela ya vathi va yakurumuwa vale, nookhalana ekina ennilipelela. Mwaha wa yeeyo munliyalanyu itthu sa molumwenkuni. Iyo sihookhwa, wa nyuwo. Vo eri Erooho.

Vano nwehe okathi onkelelaahu ohoole vano, irooho piili.

<sup>139</sup> Erooho Yoowaarya ti Oyariwa vasya, hiyo noosuwela eyo. Onkhala oyariwa vasya, ni Erooho ya Muluku. Ti siiso muniyariwaanyu, ni Erooho. Ooyariwa ni Erooho, iwo Oyariwa vasya. Vaareera. Nyuwo muyariwe ni Erooho; vano okathi oniyariwaanyu ni Erooho, munkhala oosareya Erooho Yoowaarya. Vaareera.

<sup>140</sup> Vano okathi ala aili ankhalaaya elapo ya vathi, a erutthu ni a erooho, imaara sikina e...Miyo kihoona ela. Vano nimalihaka, kintthuna kimalihe vano, kihimyaka ela minuutu vakhani. Mwerutthuni wala mwa a erooho, khula mmosa... Vano kinroromela wira atthu othene anoovara yeela. Vano mukhale oomaala ni oottittimiha ntoko sinweryaanyu.

<sup>141</sup> Vano, mootoko woona yeela? Munimoona mmakerejani mwahu olelo, hata mmakhuruni nivalaanne ahu ni khupaka mitthenkeso; ni nihoona sothene iya. Ni moomoona mulopwana okuxa Yoolempwa emosa, nto, munna, mulopwan'owo onoowerya okuxa Yoolempwa eyo n'ukhaliha ekumi vasya, okhaliha ekumi voolikana ntoko silaiheriwaaya mBibiliani. Nto mutthu mukina onoomoona owo wira, nto owo onimoorwa ni weererya wira yeeyo, n'uvonya. Kinroromela wira munoosoma vano. Owo onoovonya. Mwaha wa xeeni? Yoolempwa khiyuupuxeriwe wa yoowo. Owo oneererya otakiha. Owo oneererya wira ntoko etthu. Owo khaari...Ahe, khino owo ovelelelihiwe ni mutthu. Khino mulopwana mmosa iirale, "Ahe, nyuwo pooti wira etthu emosaru." Moone, siiso ntoko Yesu sihimaly'awe wira yaarowa okhala siisa. Bibilia onnihimya khalayi ene ya mahiku ookiserya, "Ntoko Yane ni Yampere yaamuvaanyinhe aya Moise."

<sup>142</sup> Vale aaphwanyaneya Moise, ni vale aaphwanyaneya Yampere. Vano Moise aahirihela vathi ekopo awe, khukhala enowa. "Vano," Farawo khwira, "rwaani nno, Yampere, nyuwo munoowerya wira etthu emosaru." Vano owo khwira, moone. Masi exeeni yiiraneiyee? Vano ekopo ya Moise yaahikhuura ekopo awe. Moone, yaahooniheriwa. Ekopo yaari vayi?

<sup>143</sup> Eri ntoko moonelo wa muupuwelo muulupalexu. Eri ntoko olapela minepa nno. Eri ntoko ikereja kamosa-kamosa iya sinaamini mwa erutthu, soohapuwa saana. Itthu sa...Awo aniira, "Vano, eyo yaari ya nihiku nikina." Iyo siri ota voomalela. Masi nwehe erooho ela mahiku ookiserya moota empaceryaaya otakiherya Erooho y'ekeekhai. Munnona? Ti vaavo mulattu ompaceryaya. Voolikana ntoko ele y'ekeekhai enrwaya, moone; masi owo khaawenrye wooniherya, owo khaawenrye wiiriha eyo ovilela, khaawenrye opisihia. O Muluku!

<sup>144</sup> Atthu animoorwa ni wira, "Ni, miyo kookhalana Erooho Yoowaarya." Nkawehani moota awo ankhalaaya; eyo khenkhala okhuma muhakalaliho mmosa mpakha mukina, okhuma

muthukumano mmosa mpakha mukina. Eyo ehooniheriwa, awo kharina Eyo. Mulopwana ayariwa-ru ni Erooho ya Muluku, wala muthiyana, awo ankhalana mihokorokho sa Erooho. Awo animweetta vooreera murima. Awo ankhalala ekumi yeeyo. Munnona? Awo ankhalala ottaiwene wa itthu sa molumwenkuni. Muluku onookela mwa yaawo ni wiisooniherya Mmansawe, ni onnooniherya wira Owo Mulukuu onvara muteko mmwe. Mukina onootakiherya. Munnona?

<sup>145</sup> Itakiheryo, ti yeeyo eniireyaka okathi wothene, atakiheryaka. Nkanweheni Iximayeli, ni Isakhi; ni okathi wothene, moone, etakiheryaka. Nkanweheni profeta Moise, ni munwehe profeta Palaamu. Munnona? Munnoona moota awo anrwaasaya! Nkanweheni Yuta, ni munwehe Yesu.

<sup>146</sup> Ni Yesu oohimya khalayi ene wira Erooho Yoowaarya ela, mahiku ookiserya, yaarowa okhala Ekanyeryo ya Muluku. Vano, exeeni yaarowa okhala ekanyeryo ya nxeni? Waarowa okhala okhootta Ekanyeryo ya Muluku. Maana, othene yahaarina Ekanyeryo ya Muluku yaarina ekanyeryo ya nxeni. Nto vakhala siri ikanyeryo piili sa erooho, emosa aya enrowa okhala ekanyeryo y'ekeekhai ya Muluku, ekina enrowa okhala okhootta waamini. Munniwerya woona?

<sup>147</sup> Nkawehani ekanyeryo mwa Waataana Wa Khalayi. Okathi nlope naarumaaya, yopeeli, khula miyaakha khata, i—ipottha saamutaphuwa okhala wira nlope naahiruma. Ahe, atthu othene yaatthuna otaphuwa, yaamuwerya orowa. Masi akina aya, waanaasivela okhala ipottha, tivo yaaroihiwa waltaari ni vanipottoni na mukereja, ni yaamuttemuliwa ni ettemulo. Ni yaakhala ooheliwa eneneero mahiku othene, awo yaamurumeela pwiya yoowo okathi wothene.

<sup>148</sup> Ni olelo nyuwo munimwiiwa mutthaka wa Ehapari yooreera wa Ekeekhai, “Vano munoowerya okhala ootaphuwa mwatthuna vale,” Muluku onlavula ni nyuwo. Masi nyuwo mwaphiyaru mpakha mukaano ola va vano khuweha ota, ni mukhalanne-ene osuwela w'Ekeekhai, vano nto khunarukunuwa, owo onimoottemulani owaruni nto munrowa okhala mulipa-oowaamini a akhili mahiku othene. Nyuwo munookhala natiini ni orowa okereja, masi khamunkhalakhala mwaakhelaka Erooho Yoowaarya. Moone, vano nyuwo munoorumeela yeeyo mahiku anyu othene. Vano, ekanyeryo ya nxeni, wala Ekanyeryo ya Muluku. Ni hiyo nahaattamela.

<sup>149</sup> Vano, nkawehani, Masu ahaana okhala oowuupuxeriwa: wiiwa Yaawo, osuwela Yaawo, ni wira voolikana ni Yaawo. Atthu anci-ene animwiiwa, masi khanrowa osuwela Eyo.

Muluku onimwiira, “Ola p'ukathi anyu.”

<sup>150</sup> “Nkinrowa okhala santu oophirikeya. Miyo—miyo nkinthuna etthu ya Yeeyo.” Moone, awo khansuwela Eyo.

<sup>151</sup> Ninoorowa omithukumanoni, Erooho Yoowaarya yuulupale enookhuruwa. Miyo kaakilaanthe vale nihiku nlo, okathi koonale-aka yoowoona khuhimya oratteene yeeyo. Miyo khwira, “Va onoorwa mmiravo mmosa.” “Rwaakani va,” kimuuvela namuteko ole, “murina eretta ya murima ni mumphavela . . .”

“Ayo. Eyo ekeekhaii voolikana.”

<sup>152</sup> “Munnimoona muthiyani’ole onrwa vale?” “Murwe va. Murina muuwe vanipeleni, ni ori vanipeleni moonoo woothiyana, ni muri ni mukhalelo wootepa. Nto nyuwo mwa natampi ni muhi . . .”

“Vekeekhai ekhweeli.”

<sup>153</sup> Axilopwana ale akilanthi-ene vale, khuwehaweha, alaleyi ni othene, khwira, “uh-huh!” Anoorowa vamuthukumanoni, oweha Erooho Yoowaarya weetteetta vamuthukumanoni ni waahimeerya isiiri sa mmurimani, itthu siiso. Aniira, “Yoothamaleya. Kinoona wira. Ayo.” Munnona? Oh, munna! Munnona? Eyo—eyo eri epantte ekina, yookhala etthu ekhumelenle vale. Athiyana anoothhikela akelelaka ohoolo, yiiraka etthu yeeyo. Alopwana anoothhikela, ntoko ekuluwe vamaroveni vava ni mwalapwa vamarapheyoni vawe, siiso. Khamunooona? Vano kinlavula ni e . . . e . . .

<sup>154</sup> Moone, muhaana osuwela nto, mpatthani, mukhalelo xeeni mury’anyu-mo. Mwaha wa yeeyo kihimalyaaka sa efiita ela, miyo khwira, “Ti ya ekereja paahi.” Munnona? “Ekereja paahi.” Vakhala wira muhiitthaniwa okhuma waarya . . . okhuma mw’epiphini okela moWaaryani, okhuma mookhwaani okela mw’Ekumini; okhuma muupuwelo wookhaleleya, wo omutthokelela Kristu, okela musuwelelo wo oyariwa vasya; ni nwehaka makhalelo anyu, anihya epantte aya itthu sa molumwengkuni, ni khunamweemererya Kristu, enakhale-ru exeeni; vano yookhala etthu ekhumelenle. Munnona? Yookhala etthu mwa nyuwo, envoliwa etala ni eneetta, ntoko saaryaya ni Yakope. Moone, nyuwo munwana n’Apwiya, nyuwo muneetta voovirikana nuumala yeeyo. Yookhala etthu yoovirikana mwa nyuwo, moovirikana.

<sup>155</sup> Vano, ehaana, ehinatthi wiiriwa, ehaana okhala yoowuupuxeriwa nyuwo. Miyo khenikicala, miyo kaamuwerya weemela va n’ulaleya mpakha miyo okhalana . . . maihi kihalanne aka omora, mpakha makhata aka ookhurupuwa ni kaarina miyaakha miloko mithanu na mixexe, ni nyuwo mwiiwaka khula nihiku; mpakha Muluku okhaliha ekumi eyo wa nyuwo, nlelo muri ni mukhalelo mmosaru.

<sup>156</sup> Kookuxa mahiku maili kisomaka ni kivekelaka mwaha wa yeela. Munnona? Miyo kiirale, “Pwiya, kihaana ohimyeerya eyo ekereja?”



157 Etthu emosa khwira, “Muhimye. Okathi ori vakhiviru. Muhimye.” Kinnoona wira Awo anookikumiha naanaanoxa, tivo miyo—miyo kintthuna wira musuwele.

158 “Khaavo onwerya orwa wa Miyo,” ohimmye ti Yesu, “vahikhanle wira Atithi Aka anoomuruuha toko. Oh, koosuwela wira munihimya wira mookhalana Muluku ni Abrahamu, ntoko tiithi anyu; masi kinimooleelani ela, nyuwo mwa . . . a tiithi anyu xetwani,” ohimmye ti Yesu. Atthu anatiini, anamukuttho, ni atthu aalupale, “Nyuwo mwa a xetwani, tiithi anyu.” Munnona? Nwehe, mihokorokho sa Erooho.

159 Vano, moone, ehaana okhalihwa ekumi wa nyuwo.

160 Nkaawerya omutthokelela Nowe iiraka, “Moosuwela? Khino vanooweryaneya orupa epula nihiku nlo, tivo miyo kinookhuma paahi kiitekele ekalawa. Yaruparu epula, ahe, kinookela mukalawani kirowe. Ni khiyaavo enrowa okihaaxa, okhala wira kinrowa okela mukalawani kirowe.” Mwaamuwerya otthokelela? Nnari. Nnari. Khiyaari yeeyo. Yaari siiso. . . Oh, Ale Oothanliwa yiwe vano. Yaari siiso, namanyemula oopacerya aarwiiye, ntoko Bibilia sihimaly’awe wira yaahikhala, khumunyemula, owo aamuhiya enyutto awe arowe.

161 Ntoko atthu siniiraaya olelo, ampacerya ni Yesu; nto yaweha-ru khoona Ekeekhai, awo antthikela ottuli. Khanwerya ovilela.

162 Ntoko namalaleya ole oosuwanyeya iirale, “Eyo—eyo enoohonona muteko aka kapatti-kapatti.” Nkincala muteko Erooho Yoowaarya onrowaaya ohonona. Ohaana ohononiwa. Vano, masi, moone, iwo wiisoona, yoowaatta ya mulopwana, yoowaatta ya mutthu. Oh, nwehe ela vano.

163 Nowe aari ota opuwani, ni owo aahiiwa, ni aahisuwela, ni aahiira. Hata wira anamanyemula akavi jaarwiiye, owo aahiteka naanaanoru.

“Nowe, nyuwo mwa santu oophirikeya.”

164 “Muhikihaaxe hata vakhani.” Otthikela atekaka! Owo aahiiwa. Owo aahisuwela wira aari Muluku, owo aahiwehaweha ni Soolempwa, ni yaari siiso. Owo aahiteka ekalawa, mwa khula enamuna.

165 Mwaamuwerya otthokelela, mwaamuwerya otthokelela yeela, wira Moise, arowaka wEjitu, aahikhuma nihiku nimosa khimuhimeerya Sefora, mwaar’awe, “Sefora, moosuwela? Miyo koorattiha vakhani elavulelo aka. Koolokiherya vakhani matemaatika aka, ni ekhalelo sa itthu, oh, itthu sinci-ene sikina, ni osoma waka. Okhuma okathi onsukihaaka ipwittipwitthi nno, miyo—miyo—miyo kihilokiherya vakhani mwa yeeyo. Miyo koovonya wEjitu. Kinoona wira kinoorowa kalokiherye.

Kinoona wira kinoorowa”? Nnari, niwipi noopacerya naarowa omurweela, owo aamora vaavale vene.

<sup>166</sup> Owo iirale exeeni? Owo aarooliyala sothene aasuwelaawe sa ekhalelo sa itthu ni sa akhili awe. Ti yeeyo yaamphwanyinhe mukattiyamiho.

<sup>167</sup> Ti yeeyo ekelinhe ekereja mmukattiyamihoni olelo, ti alaleyi anci-ene oosoma saana oohiyariwa ni Erooho. Alopwana n’athiyana onaasivela wiiwelela itthu ilavulelo s’othhokelela, ohiya olaleya owerya ni ohihimuwa wa Yesu Kristu. Ti yeeyo ennikhaliha mmukattiyamihoni olelo. Hiyo khamiphavelatho ixikola suulupale ni osoma wa alaleyi. Hiyo ninaatthuna axilopwana oowiitthaniwa ni Muluku ari oosareya Erooho Yoowaarya, ni kahi teyoloxiia oopakiwa ni mutthu a mromolelo khata. Hiyo ninaatthuna axilopwana oowiitthaniwa ni Muluku.

<sup>168</sup> Moise aasukiha ipwittipwitthi, aahikhala ni aahiliyala. Owo aahisuwela wira akhili awe yaahivonya. Owo aahisuwela osoma wawe waahinvonyela. Owo aasukiha ipwittipwitthi, masi owo aahiiwa oh, “Murule ixapattho sanyu, Moise, nipuro muryaanyu ti noowaarya.” Owo aahiwiriyana. Yaari exeeni iyo? Nsu Nlaikha naalavunle aya naari na Yoolempwa. Owo aahimulaiherya Abrahamu, tiithi awe, “Kinimwaaxekurya atthu amanle-ene okhala iwe miyaakha imiya xexe, ni kinimwaakumiha ni moonu wa ikuru.” Owo aahisuwela wira ele yaari Yoolempwa ya Muluku yooniheriwe.

<sup>169</sup> Mukihiye keemele minuutu mmosa. Muhiye ela ekele muhina. Munniwerya woona etthu enihimy’aka olelo? Masu a Muluku animooniheriwa ohoolo wanyu, nave nyuwo khamunsuwela. Muupuwele vano oSotoma ni Komora; mmuupuwele natiri a Kristu mahiku ookiserya.

<sup>170</sup> Moise aahisuwela; yaari Yoolempwa, aari natiri. Owo aahiiwa, owo aahisuwela. Etthu emosa yaahikela mwa yoowo, munna, owo aahiwerya orowa wira eyo nto. Owo aahiira. Owo aaniwerya orowa iwe ni omweemexa khula Farawo. Owo aaniwerya wiitthana ihasara okathi owo aatthunaawe. Owo aaniwerya otthukula Ephareya Yooxerya, okhala wira aahiiwa, owo aahisuwela, owo iira mpantta wa Muluku.

“Miyo kinookhala Muluku wa nyuwo, nyuwo mukhale profeta wa Miyo,” Owo khuhimya.

Nto owo khwira, “Nkinwerya wira.”

<sup>171</sup> Owo khwira, “Ahe, nto, nyuwo mukhale muluku, ni Aroni akhale profeta anyu. Muhaana orowa, khula enamuna.”

<sup>172</sup> Owo khamahimyeke paahi wira, “Ahe, khino kihaana orowa kalokiherye itthu.”

<sup>173</sup> Mwaamuwerya omutthokelela Eliya Omwaako Karmelo, airaka, “Moosuwela, elapo ela ti yoosareya etampi saana,

alakela, khino kaahaana okhuma omuleela Akhabi wira aahaana wuuliwa muru mmansaawe. Khino kaahaana owela vamwaako vale kikilaathi, ni otthuka okathi munci-ene, mpakha atthu ale wooceya ni ophweeleya mwaha wo okoona miyo osulu iwe kikhwaaka etala”? Nnari. Nnari. Khiyaari yeeyo.

174 Masi owo aahiwa, ni khusuwela, ni aahiira. “Miyo kihaaruma anakhuku wira yoolyihekeni. Nwele vale, waattamela oKerithi.”

175 Vaphiyalyaya okathi wo wooniheriwa eriyari ya Pahaali ni Muluku, owo khwira, “Rowakani, mukuxe mikuttho sanyu, mwawiirhe etthu p’itthu munthunanyu, ni mwanvekele muluku anyu.” Vaithikilanse aya, erutthu yinci-ene, ni khutupha, khiyaareere onyakula, owo khwira, “Mukhuwele vancipale vakhani, khino khokhanle, ohaana muteko. Khino onoorupa.” Oh, munna!

176 “Ahe, moosuwela?” Owo khwira, “Miyo ka mulipaoomwaamini Yehova, tivo kinoowerya wira yeela, khula enamuna.” Oh, nnari, muhitakiherye eyo. Nnari. Muheererye okhala Eliya mpakha Muluku owiitthaneni wira mukhale. Ayo, mulopwana. “Miyo ka murumeyi a Yehova.” Aakhala imiya thanu na piili a yaawo ohitto iwe, nave, masi khaavo mmosa a awo eheerenrye wira.

177 Nto okathi omuthikinlyawe mwaanyompe khimuyeeherya maasi, owo khwira, “Pwiya, kiirale ela ntoko okiruma Wanyu.” Moone e...Khula mutthu mukina aarowa weehererya, waamukhala ovonya voomalela.

178 Ehaana okhala yoowuupuxeriwa wa nyuwo! Erooho Yoowaarya ehaana wooruuhelani ni owooniheryani.

179 Ti yeeyo eniiraneya olelo. Khamunwerya owela, waltaari, ni wira, “Ahe, Aleluya, Aleluya. Pwiya, kintthuna Erooho Yoowaarya. Aleluya, Aleluya.” Nnari.

180 Masi, munna mulopwana, muthiyana, Erooho Yoowaarya yawuupuxeryani-ru Masu awo nyuwo, munimwaakhela Eyo muhinathi okhuma vakhukuluni vanyu. Etthu mwa nyuwo enoovihwiwa. Mulaleyi khonrowa wooleelani wira mwiire *ela* ni mwiire *ele*. Mataakhuru a khalayi anoomora paahi, vano mataakhuru masya anookkhuma. Ti yowuupuxeriwa wa nyuwo. Khamunrowa omunanareela mulaleyi aalaleyaka Ekeekhai ya mBibiliani. Munooophenta Yeeyo, munootthuna waakhela. Eyo Yolya ya munepa anyu.

181 Hata Yesu, Mwaneene, Owo iirale, “Nkiniira ele Miyo entthunaaka, Yoomi. Mwaana khanwerya wira etthu woohikhala ele Owo oniwoonaawe Atithi yiiraka.” Masu...Owo aari Emanuweli, Mwaneene. Owo aari Muluku elapo ya vathi; Yesu aari. Owo aari erutthu Muluku aakhalaawe-mo. Owo aari eheema Muluku aakhalaawe vathi vaya. Amen. Masi mwa sothene iyo, Mwaana a Muluku ooyariwa ni harusi, Emanuweli

mwa omalela wa Erooho, Owo aarina Erooho woohikhala mphimo. Nto, nnakhala vo, mw'erutthuni mw'Awe Yoowo, Owo iirale, "Miyo nkiniira hat'etthu mpakha Atithi okooniherya toko." Uupuxeriwa Yoowo, wira aire!

<sup>182</sup> Satana iirale, "Mutatuxe maluku ala akhale mukatthe, ni mpake mwiiriirya. Kiwooneni Nyuwo mpakaka."

<sup>183</sup> Owo khwira, "Yooempwa wira, 'Mutthu khankhala mukumi ni yolya paahi.'" Oh, wulu! Masi okathi muttitthi w'atthu waavoliwe aya etala, Owo aahikuxa mikatthe mithanu n'ihopa piili sikhaani, khwaalyiha atthu ikonto thanu. Oh, Aleluya! Munnoona enihimy'aka?

<sup>184</sup> Muheererye otakiha. Ti yeeyo eniireya ni Pentekosite olelo. Tiyeeyo eniireya ni ekereja olelo, aakhala anci-ene aneererya otakiha wira aakhalana Erooho Yoowaarya. Aakhala anci-ene aneererya otakiha ovoniha wa Muluku. Aakhala anci-ene aneererya otakiha itthu soohiyana-hiyana sa Apwiya. Khimukhanle wiiraka yeeyo. Itthu iyo sinrwa mwaha wo othanliwa, Muluku aitthanaka, munikhuma mmirimani mwa ame anyu ni yeeyo. "Soovaha ni wiitthaniwa sinikhala woohirukunxa murima." Oh, wulu! Eyo ekeekhaii. Nyuwo khimukhanle wiikhalihaka etthu muhikhanlyanyu.

<sup>185</sup> Masi Muluku awiitthanani, mukhale mutthu ooxukhuruxa molumwenkuni okhala wira Owo oowiitthanani. Nto enikhala y'ekeekhai wa nyuwo.

<sup>186</sup> Ntoko saarowaaka olavula, kaarina okathi, mwaha wa ikhopa nihiku nikina, eyo yaahikitikiniha. Kiira kihinatoko woona khalayi, ni nkaawerya wira. Hattie, okilaanthe-ene ottuli iwe akiwehaka. Vaaweryaneieye sayi eyo wiiraneya? Khivaaweryaneya wiiriwa, masi yaari yowuupuxeriwa ni Muluku, okhalihwa ekumi. Masu yaaroolavuliwa nto khwiiriwa siiso. Aleluya!

<sup>187</sup> Paulo, mwaamuwerya omutthokelela owo airaka, "Kinnikhalaka mphareya mu mahiku muloko ni maxexe othana n'uhiyu, ni hata ittheneeri wala mweeri, wala nsuwa wala hat'etthu. Kinoona wira kinoorowa iwe kaaleele, 'Mukhale oominyala, okhala wira Muluku onoonikhapelela, khula enamuna'?" Oh, Muluku khonvara muteko siiso. Muluku khaniira eyo.

<sup>188</sup> Waamini wanyu ori saana, munna. Waamini wanyu ti woathamaleya. Masi mpakha etthu ene okhala yowuupuxeriwa wa nyuwo!

<sup>189</sup> Oh, va eri esimaaforo yooxeerya eheliwe vale, nto koonaka...Miyo kiniira, "Ahe, kookhalana nnawo naka wawuupihani. Miyo kookhalana ekaaro. Kinoowerya ovira vasimaaforoni vale iwe, kuupihaka imiilya emiya ni miloko miili khula ewoora." Eyo ekeekhaii. "Kinniweriya woona ikuru

vathi va nnawo naka.” Masi vanreerela mulipelele ethoonyeryo ya “murowe”. Aleluya!

<sup>190</sup> Munniiwa enihimy’aka? [Muthukumano oniira, “Amen.”—Mol.] Yapattaru ethoonyeryo ya *murowe*, vaareera. Okathi munuupuxeriwaanyu etthu, ni Muluku khusuweliha ntoko Owo siiraly’awe ottuli wu, vaareera. Masi mpakha Owo wira, nirina nikhuru nuulupale na anaYuta atakihaka, yeettaka nno ni nno, yiiraka, “Ahe, miyo kinoolikana ni yaawo. Ni, miyo ka muKristu.”

<sup>191</sup> Oh, khamunuupuwela? Aana a Sikewa, yaakhumme khwira, “Hiyo ninnoorumani, ninnoorumani mwa Nsina na Yesu yoowo Paulo onimulaleyaawe. Mukhume!”

Owo khwira, “Paulo miyo kinnimusuwela, ni Yesu kinnimusuwela, masi nyuwo mw’ani?”

<sup>192</sup> Okathi onimoorwa okathi yooreera ni yootakhala enrowaaya wooniheriwa. Eyo ennoonihereya mwa aKristu olelo. Eyo ennoonihereya mukereja olelo. Eyo ennoonihereya mw’athuni olelo. Miyo kinimoovarelelani okathi munci-ene; kintthuna wira nvare ela.

<sup>193</sup> Paulo khonahimyeke wira, “Kookupali wira kinoorowa paahi kiire, ‘Ahe, mukhale oominyala.’” Nnari.

<sup>194</sup> Owo iirale exeeni? Owo aaiwale Nlaikha. Owo aahisuwela wira naari Nlaikha nenle naalavunle ni yoowo okathi wothene. Owo aahisuwela, vano aahiira. Aahiwela khwira, “Mukhale oominyala. Tthiri Nlaikha n’Apwiya, Yaawo kikhanyaka murumeyi aya, naaheemela vakhiviru ni miyo nsana ohiyu, nikoonihaka yoowoona wira khiyaavo jaarowa opweteya, nukalawani mu. Mukhale oominyala. Murowe mwalye yolya anyu y’ohiyu vano. Sothene siri saana.” Amen. Okathi onuupuxeriwaanyu, okathi Muluku onikhalahaawe oratteene!

<sup>195</sup> Kihaana yoohimya va nipuro nlo, kaahikhalana yoolempwe-ene. Ela eri vaava va. Uh-huh. Hiyo niri woomalelani wa itthu sothene. Mukihiye kiruuhe ela sa vano, kimalihaka. Kinroromela wira Muluku oowuupululelani etthu. Nkawehani. Itthu sothene siri woomalelani. Ookhala aavekenle ohiyu owo, kookupali wira aari Munna Fred Sothmann, hiyo naamukoha moota waattamenlyahu woomalelani.

<sup>196</sup> Munna Demos Shakarian aarimoona yoowoona eyo wooniheriwa, ni khwiiranya mahiku mathanu ohoolo waya, voolikana, eyo yaahalela omukumiha voopuroni. Owo aarookiihana. Khwira, “Ehaali ya Joseph?”

Miyo khwira, “Salama.”

Khwira, “Owo onnoona soowoona?”

<sup>197</sup> Miyo khwira, “Ayo. Owo ookileela sa Davidi, mwaana a Munna Wood, vaavo aamonry’awe vamootani, mahiku mararu wala maxexe ehinathi wiiranya, voolikana.”

Owo khwira, “Moosuwela, itthu iyo sinaatthara amusi.”

<sup>198</sup> Miyo khwira, “Naxariya wala ootakhala, ennimwiira, khula mmosa. Enaatthara amusi.”

<sup>199</sup> Nto hiyo naamulavula vakhani, vano awo, Fred khukiirela, “Enkumihiwa vayi yeela, Munna Branham?”

<sup>200</sup> Miyo khwira, “Nkawehani, Fred, nrowe nikuxe ephattu. Muluku onivara muteko mwa ephattu Awe. Nkawehani, nwehe etthu yaakhumelenle. Nsuwa niphattunwe Onikhuma nsuwa. Osilimu wa khalayixa orinaahu, ti Xiina.” Hiyo othene noosuwela eyo.

<sup>201</sup> Osilimu wa khalayixa orinaahu ti Xiina. Vaareera. Nto osilimu oheetta mpakha onkela nsuwa okathi wothehe. Nto mwaarowa orowa mpakha vayi mwaakhumme Olimani Onkela nsuwa, murowaka epantte ekina? Mwaamurowa mpakha oXiina. Vekeekhai. Hiyo nri woomalelani. Bibilia oohimya, profeta oohimya, “Ninookhala nihiku nihinrowa okhala ohiyu nakhala othana, okathi nsuwa ninviraaya, masi okathi wa makaaripi,” okathi vakhani ehinatthi omala nno, “onookhala-tho Waarya, siiso.” Yesu ohimye wira, “Enookhala epula yoopacerya ni epula yokiserya. Nto epula yookiserya enookumiherya soopiili epula yoopacerya ni epula yookiserya, ehuhu emosaru.” Hiyo nri okathi wa woomalelani.

<sup>202</sup> Nkawehani va, mukihiye kiwooniheni. Ipoliitika siri woomalelani. Munnaamini yeeyo? Mukoonihe etthu olelo. . .

Elapo ela ti yootepaxa onanara molumwenkuni, mwaha wo ohononeya, otakhala. Taani aasomale Courier Journal ohiyu ule, oLouisville, okathi athiyana ala othene, othanliwaka, khula elapo, muthiyana oomalela oreera elapo eyo, ni oweemexa vale wira akhale Muhano a Olumwenku? Atthu othene yaahiira omuhiya Ruusiya. Nto awo khuruma orowa okohiwa Khrushchev, “Mwaha wa xeeni?” Owo khwira, “Ruusiya khonaarula ikuwo athiyana, wira yeetteke ohoolo w’alopwana.” Nloko n’epakawu, nloko nootakhala niruuhaka oveehiwa wa hiyo niniisiitthana aKristu, khwira, “Ruusiya khonaarula ikuwo athiyana aya, wira ekhumeke yeettaka siiso. Ni khamuniwoona akaputtulula nakhala itthu ntoko seiyo oRuusiya.” Awo t’ale ootakhala. Ni hiyo niniisiitthana “aKristu!”

<sup>203</sup> Khivanxankiha Bibilia ohimmyawe wira, “Meesa othene aasareya marapheyo. Nto taani okhanlyaka omwiixuttiha Mwiixuttiho, ni taani ottharuxiwe waamwa? Masi nikano vasulu va nikano, ni yooruma vasulu va yooruma. Maana kinimwaalavulela atthu ala ni moolumo ookukuma ni ilavulelo sikina. Nto nno ti Omumula. Ni sothene iya, awo khatthunne wiiwa.” Hiyo nrina muupuwelo ahu w’akhili. Oh, moota yaarowaaya okhala yooereera okhala nihiku nothene mwa Yeela.

<sup>204</sup> Ipoliitika, soopahuwa! Atemokrata, Arepublikaano, ni othene, t’omora. Exeeni iyo? Iwo ottopanyerya. Khula mutthu

onivara muteko iwe, ohiyariwe vasya, t'a xetwani. Xetwani ohimye wira, "Omwene wothene molumwenkuni ti wawaka," ni Yesu khaavaanyihanne ni yoowo. Olumwenku oneettiheriwa ni xetwani. Ni khula mutthu oninvarela muteko kuveerunu, aahikhale-ru muKristu, owo t'a xetwani ni oninvarela muteko xetwani. Ilapo iya sothene sinoomora sikhale sa Yesu Kristu okathi Owo onrwaawe, enookhala Mileeniyu.

<sup>205</sup> Nkawehani va olelo, muteko awo arinaaya vano. Akipwapwelaka, mwaha wo orumeela musurukhu iwe mwaha wa aKristu, ni atthunaka okivaha miyaakha miloko miili mukhatteya ya estaatu, mwaha wo orumeela musurukhu wira ovarihe muteko mweetelo wa etiini. Ni wishki ni saravexa ni asikaro khasinlinvwa itoolare imilyawu miloko sene khula eyaakha, wira enanarihiwe elapo. Ni miyo kimphavela olaleerya exariya, keemenle-ene vamukhora va Yesu Kristu, anthuna okiroiha mukhatteya mwaha wa yeeyo. Ni okuxa itthu ntoko iyo sootakhala, sa vathi, soocencera, osuwela, ni ohaaliviha wira epakeke ipokrama sa televisawu sihononne olumwenku, yaaroihale athiyana wa alapwa. Emosa wa epaluwa yuulupalexa elapo etonko aya okhalana, ni awo anoottuniherya. Awo anookiroiha miyo mukhatteya mwaha w'olaleya Ehapari yooreera, mwaha wo okuxa itoolare vakhani va wira—wira kilaleye Ehapari yooreera, atthu anikivaha aya wira kilaleye Ehapari yooreera. Nkihiyo thaaciri ni nkikhanle ovukulaka eyo. Masi nnakhala vo awo anthuna okirowana mukhatteya, okivarelela miyaakha miili, ni naanaanoru khunarwa ophukiwa. Oh, omora xeeni, onanara xeeni! Muluku, mmoriwe ikharari.

<sup>206</sup> Miyo kinihimya ela paahi, khino ti siiso Muluku orinaawe Owo ohinatthi oveleeliha ekapwitthi ya aatomu. Muhaana wira etthu yoonanara, moosuwela. Muhaana omukwannya oottikittheliwa Awe emaara emosa, tthiri Yoolempwa yeela, ehikhale wira. . . "Muhimukwannye Oothanliwa Aka." Ti yeeyo. Tivo vakhala wira entthuneya yeeyo wira eruuhe olamuliwa, ntoko siiraly'aya mahiku a Daniyeli wala nipuro nikina, ekhale siiso. Miyo ka murumeyi Anyu, Pwiya. Ti yeeyo. Oh, ayo.

<sup>207</sup> Ipoliitika, siri vathi! Elapo, yohononeya! Ahe, nkawehani! Awo anoorowa waawariha akaputtula anattoropa naanaano. Oh, wulu! Ipoliitika, ekhotto! Ipoliitika siri woomalelani. Ti yoovonyeya okhalana anamaruma ookhanyererya. Ipoliitika ti soovonyeya. Awo yahaakhalenle-ni ni mwene oreera murima ntoko Muluku saavanhe awe, Davidi? Mwenye muulupale a oInklatera iirale, okathi ela—okathi etemokrasiiya ela epakiwaaya, iirale, "Yoolikana vano, masi onophiya okathi," owo kuhimya, "ehinrowaya okhala etthu. Sothene sinrowa okhala matthanka nave woohikhala nankura." Ni owo ookhalana exariya. Khwira, "Anapoliitika aneemela muplataforma sikhaani mwa khula nlootho, mithinto sothene sa itthu sinimuhonona kuveerunu." Ni mulopwan'owo aahikhalana

exariya. Vekeekhai ti yeeyo eniiraneya.

<sup>208</sup> Mulopwana mmosa onowerya okhuma va, n'uvira va ni ohapaliwa, n'ukhera itthu sothene owo onthunaawe; n'urowa iwe, owo onnaasuwela atthu othene, vano khenihimmwa etthu. Mmuhiye mulopwana masikhini, wala muttthu ohinsuweliwa, eererye wira eyo, nto anooroihiwa mukhatteya. Ohononeya, okhala vathi, soonanara, ipursento miloko mixexe a yaawo oothelana yaaworu. Muupuwele yeeyo, Sotoma ni Komora emaara ekina! Nookhala nikhuru, ninthuneya okhala natiini.

<sup>209</sup> Miyo—miyo kinniikoha etthu enrowa wiiraneya, okathi Mukhulupale ontharelana onkelaawe? Muluku oonivaha mulopwana mmosa ooreera murima oothunku, Dwight Eisenhower. Nto vano miyo kinoo-...Nwehe etthu enrowa okela ohoolo waya. Ni vookupalixa, hiyo pooti okhalana nikhule okathi ontharelana. Masi onnoorwa, “Farawo ohimmusuwela Yosefe.” Muupuwele yeeyo. Kinoophiyerya yeeyo muhina mwa esekuntu emosa paahi. Ipoliitika ti soopahuwa. Hiyo noosuwela eyo.

<sup>210</sup> Ekhotto yoophiya woomalelani waya. Oh, mwa okathi mmosa awo anrihelelana maluku mmosa ni mukhwaawe, omanana mmosa ni mukhwaawe vamuru ni ipaso sa maluku, nuumala anooa manyakara ni matthere. Nuumala awo aakhalana ekapwitthi, nuumala metralyatoora, nto miloko mithanu na miraru ni thanu na tthaaru waAlemaanya, ni ikapwitthi suulupale ni hiyo. Nuumala khuriha ikaranaata sa mmatatani ni ekaaxi ya veneno. Masi awo arina musika wa itroxeeniyu vano. Ekhotto eri woomalelani. Khula elapo yookhalana, nto munrowa wira exeeni vano? Hata elapo ekhaani olelo, yakokha-ru esyalo, ti yeeyo tu arinaaya wira, yothene enoovava. Ekhotto eri woomalelani. Huh! Amen. Ekhotto eri woomalelani. Ipoliitika siri woomalelani.

<sup>211</sup> Osoma ori woomalelani. Onanara murima w'amwaavano ori woomalelani. Anamwane, khisaavo miroromelo wa anamwane, awo aavahuwasa. Khamunwerya okhalanaka olelelya. Khamukhanle orowaka nno oxikola khukhalana, omphwanya mwaana oolelelya. Owo—owo mwaana a omooroni vaara vaili aakhumaka ovikana saaryawe akelaka. Mmuhiye purusoore ahimye etthu ya yeeyo, owo onimwiiviwa. Anoopaka nikhuru nikhaani na amacupa nirowe iwe namoopele purusoore, amuroihe iwe ni amuheye. Aanipweteya mapurusoore ikonto piili. Oh, nwehererye minuutu mmosa, kookupali wira yaari mapurusoore ikonto miloko miili, eyaakha ela yookiserya. Miyo nkinaahimyana mulattu. Nkaarowa otthuna wira, nnakhala. Vano awo aakhalana mapawe khula okathi, “Mwaavahe osoma wa okoleexiyu anamwane ala.” Awo anniphavela, masi xetwani ohaakhalana. Xetwani ohaakhalana. Ni kahi etthu yoolikana okhuma paahi ni okhala ootakhala ni—ni—ni okakhanyula mukhora ni othomeya mmwirini ohiyu wa Halloween, wala



wira etthu ekhaani yootakhala ntoko siirakaaya anamwane, wala okuxa ekarosa ya mulimi ni ohela mphironi, kahi ntoko siiso; masi awo toovahuwa. Awo aniira itthu sikhlanle ovahuwa; owoopelani, owiivani, owiivani, woohelani eveneno, khula etthu. Nlo ti nloko ninttharelana.

<sup>212</sup> Omuyara mwaana ori woomalelani, othiyana, omaama. Vano, okhoottiherya oyara ompakiwa mapuro othene, nto alapwa axikhaani aakuxa opuro.

<sup>213</sup> Olakeya, khokhanle-tho olakeya. Athiyana, anwara yootakhala; anvira mutelevisawuni, inamuna sothene sa mitakiheryo sa sootakhala sa Hollywood, inamuna sothene sa itthu, mihapo. Sothene woomalelani!

<sup>214</sup> Osoma ori woomalelani. Ipoliitika woomalelani. Ekhotto eri woomalelani. Osilimu ori woomalelani. Itthu iyo sothene siri woomalelani. Wulu, niireke exeeni nto? Exeeni enttharelana? Hiyo niri woomalelani wa itthu sothene.

<sup>215</sup> Vano ekumi ya ekereja eri woomalelani, ekereja yoolikana, ekereja. Vano, ela pooti ohaaxa vakhani, masi ekereja ya mw'erutthuni, Esawu, eyo yoophiya woomalelani waya. Eyo eniira exeeni? Emmalela mmwaataanoni mwa ikereja, wookiseryani enrowa wiitakaniha ni Romanismu, wira awanane eKatolika...wala ni eKatolika wira awanane komunismu. Paapa Yohani oniitthana ikereja sothene wira sitthike, ni iyo sinootthika. Ni awo animwiiraana vamosa, voolikana SIISO ANIHIMYA T'APWIYA.

<sup>216</sup> Nyuwo muniira, "Nwehererye minuutu mmosa, Munna Branham. Nyuwo munookhuma mphironi." Vakhala siiso, Muluku omulempe Bibilia Awe okhumme muliinyani. Muhaana okhala Mikaya, mwa mwah'ola.

<sup>217</sup> Morris Cerullu aahikileela ohiyu omosa, khwira, "Ori yayi nwanani a Kristu, Munna Branham? muYuta t'okhanle nwanani a Kristu."

Miyo khwira, "Morris! Nto nyuwo, muYuta?"

Owo khwira, "Awo t'ale oomunyokhaxa Muluku akhanle."

<sup>218</sup> Miyo khwira, "Morris, muhi! Mukileele mwa Soolempwa vaavo nwanani a Kristu okhummyawe oYerusalemu. Nwanani a Kristu okhumme oRooma, kahi a oPalestina."

Owo khwira, "Ahe, nkawehani, miyo ka...Awo anammunyokha Muluku."

<sup>219</sup> "Ayo, Muluku khohimye wira Owo ookhaliha maitho aya ohoona wira hiyo nikhalane nihiku no woona? Masi nihiku nahu ninoomala vahilekenle."

<sup>220</sup> Owo khwira, "Oh, Munna Branham, nkinatoko wuupuwela yeeyo." Moone, eyo vo.

221 Moone, hiyo niri woomalelani. Olumwenku w'erutthu, ekereja y'erutthu eri vo, woomalelani. Nwehe moota emmalelaya mmwaataanoni mwa ikereja. Axinna Oowiiwanana ahiitakanxa ni yaawo. aPentekosite ari ni yaawo. Othene aya akina animwiitthokiha. Munniwoona, aKanani ale iwe, okathi wothene irooho iyo sa Esawu, anatiini saana, ni oothukumana ni olumwenku; oohikhalana maiwelo a muroohoni, oohiwerya oxintta, oohithanliwa a Muluku, wira yiihaneliwe ota ni ovalaanihiwa.

222 Oh, kaawerya paahi osuweliha, kaawerya paahi okuruxa mwa enamuna emosa! Awo khanoona. Awo aakhalana maitho nave khanwerya woona, maaru nave khanwerya wiwa. Oh, nikhalenle-ni oowuuma Muroohoni? Vano, nwiriyane ela. Sothene siri woomalelani.

223 Ni Ekereja ya erooho eri woomalelani Waya. Eyo enimoorwa woomalelani. O Muluku! Nkawehani ottuli wu okathi Eyo epacenryaya ni Lutero, khuttikinyiwa, ale a erooho. Vano ni Wesley, khurwa mooreerihwani. Nuumala ni Pentekosite, Erooho Yoowaarya. Nto vano okathi wookiserya, Erooho ya Kristu mwa mphimo khata Mukereja, Eyo envara miteko imosaru Owo aavaraawe, otthikela-tho Muru Aya; voolikana wira Ekereja ni Kristu siiraane, ni Orwa wa Pwiya Yesu, ni ohihimuwa w'alipa-ookhwa. Hiyo nri okathi wa woomalelani. Yesu ohimye siiso, "Ntoko saary'aya mahiku a oSotoma, siiso enookhala orwa wa Mwaana a mutthu." Munniiwa saana?

224 Nkawehani ekereja y'erutthu. Nkawehani otthu awo anrowaaya-wo, anootepa orowa ottaiwene.

225 Nkawehani Ekereja yoosareya Erooho, yiitathaka ethiru Aya yothene, ewelaka mwa Erooho, (ooyeva, vekeekhai), yinnuwaka mwa Erooho, masi ekelelaka ohoolo mpakha vaphiyalyaya vaavale Erooho Yoowaarya eneetta aya eviraka mwa Yeeyo etthukulaka ephiro, yoolikana wira emwaakhele Pwiya Aya, yoolikana wira emwaakhele Pwiya Aya.

226 Nto akina aya oowiitthokiha, etthikelaka molumwenkuni, ahiivalula, atthikelaka moothukumanani, yeettaka erowaka muru owo muulupale woothukumana vathi va eKatolika. "Ni yaahikhala elatarato yaapakeliwe nxeni." *Elatarato*, "etthu ntoko yeeyo." Mwaataano wa ekereja opakiwe ni eKatolika, iyo piili vamosa, sinvara muteko vamosa. "T'ani onwerya owana ekhotto ni nxeni wala elatarato aya?" Vekeekhai nnari. Naamuwerya otthara ela iwoora sene!

227 Vano mukihye kooimeeryeni ela, nuumala onookhala okathi wo omaliha. Ti miyo. . . Kaahooleelani wira yaamurowa opisa. Miyo—miyo kinoona otteeliwa murima paahi. Okathi Muluku hata ohimaly'awe itthu iya, irale, "Muhimye. Mulavule. Muhikhale-tho oomaala. Nwooniherye Yeeyo. Awo yaahaakhele

Yeeyo, weeso ephome khekhanle mmatatani mwanyu.” Okathi ori vaava. Okathi, sothene sinoophiya.

228 Olumwenku ori woomaleloni waya. Khonwerya-tho ovilela. Ikhotto soophiya woomaleloni waya. Khivanweryaneya okhalana-tho ekhotto. Mwakhalana ekhotto, khinweryaneya; ni ole oopacerya paahi onkokha esyalo, vaamala. Ipoliitika, ti soowunnta ni soopahuwa.

229 Olumwenku wa ekereja ti Metotista, Patista, Prespiteriyaano, aPentekosite. “Iyo ikuluwe sintthikela vamaroveni vaya, alapwa antthikela vamarapheyoni vaya.” Ti yeeyo, khula mmosa a yaawo! Muluku onitthanela, okhuma mwa soonanara iyo, Ekereja ethanliwe. Eyo ekeekhai. Esawu, awo yiirale, “Hiyo na ekereja!” Miyo nkinihoverya eyo. Yakope aari tiithi awe Esawu, nave, ti yeeyo, tivo, masi—masi... Kিনিহিয়া, Isakhi aari tiithi awe Esawu, ni Yakope aari munn’awe, ni yoowo. Masi mmosa aahitthuviliwa eyuulupale; mmosa aaroothanya. Mmosa, aahiiwa, khusuwela, khwiira. Mukina iirale, “Oh, vakhalaru wira kinnirowa okereja ni wira ele eri yooreera, envirikana exeeni?” Eyo eri vo. Vano mwa... .

230 Miyo kinihimya ela nto, kimalihaka, nuulumo nla nikina. Ekereja y’ekeekhai yookhalana yinci-ene vano y’okhala. Oh, waahaana okhala okathi wa yopeeli ntoko Ekereja y’ekeekhai, wa Ekereja y’ekeekhai, wa Ekereja yoothanliwa, okathi munsuwelaanyu mmurimani mwanyu wira moovira mookhwaani khuphwaya Ekumi; okathi miniiwehanyu ni woona, oweha makhalelo anyu ni woona wira ithu sothene sa molumwenkuni soovira, wira mookhala yoopattuxiwa esya. Nwiryane vano, nimalihaka, oratteene. Moosuwela wira moovira, makhalelo anyu annooniherya, “Ni mihokorokho saya munimwaasuwela.” Ethhunelo anyu yothene ti Kristu. Nyuwo mummulipelela Owo orwa khula minuutu. Nyuwo muneetta mwa Erooho. Mnnimphenta Yoowo. Munnimoona Owo avaraka muteko mwa nyuwo. Khiyaavo entthunanyu ovara, masi Owo t’onvara paahi, Mwaneene. Oh, okathi zeeni!

231 Enikuupuxerya muratti mmosa aaronwe oRooma, wiixutta okhala muratti, mmiravo mmosa. Awo khunweha. Owo aari oovirikanaxa n’amiravo akina a wAmerika ni axiruusi, ni akina yaaronwe iwe wira yakhale aratti, ni a olumwenku mukina. Mmiravo ola aari oosuwanyeya. Owo aari mutthu ooreera murima, ni awo yaahiweha. Awo yaanikhalana meera maalupale, ni yaaniphiya iwe ni, moota eniiriwaaya oRooma, anoohapaliwa paahi mpakha ohiwerya.

232 Miyo kootoko okhala weiwo, yoomi, ni koowoona. Anookhumela mphironi, alopwana n’athiyana, yiiraka voonanara. Hata mparkini, annirupihana mparkini, vankaneya, khancala. Inklateera, nave, othene aya akina. Munnona? Eyo kehiyo yootepa ovikana nno. Etthu emosaru nno, voolikana

otakhala; paahi, enikhuneela vakhani paahi nno, mwaha wa mapiliisa ni itthu iyo. Vano, masi yootakhala paahi!

<sup>233</sup> Ahe, mmiravo ola, owo aaniirakameliha sothene iyo. Awo yaarowaka mmeerani mwaya, owo aamwaahiya orowa, masi owo aaxutta okhala muratti. Tivo, nihiku nimosa namakhapelela muulweene, aari muKristu aari waattamela mu—musewu, munikhukuni mwa sooratta, owo khwira—owo khwira, “Nrowe neettakase vakhani, mwan’aka. Nrowe neettakase, kaanitthuna olavula ni nyuwo okathi vakhani.”

Owo khwira, “Vaareera.”

<sup>234</sup> Vano awo khuwelasa, yeettaka vantumuxani, ni oowaili aya ni matata aya ottuli waya, yaahiwela ntumuxa. Nsuwa naamutupweela. Nto vano mulopwan’owo muulweene khumwiirela mmiravo muratti, owo khwira, “Mwan’aka, nyuwo mwa mutthua a wAmerika.”

Owo khwira, “Ka yoowo.”

<sup>235</sup> Owo khwira, “Nyuwo murwiiye nno wira mphwanye osoma wanyu mwa sooratta. Kinoona wira mukhalaka muratti munthuna wira owo okhale muteko anyu wa makhalelo anyu.”

Owo khwira, “Miyo kookhalana eyo mmuruni, mulopwana.”

Khwira, “Kinnoona wira nyuwo mwa muKristu.”

Owo khwira, “Ka muKristu.”

<sup>236</sup> Owo khwira, “Ahe, yookhala etthu kaatthunaaka wookohani. Miyo kihaakoha ala akina. Awo anira wira aKristu, nave.” Owo khwira, “Exeeni enookhalihani oovirikanaxa? Exeeni enookhalihani oovirikana n’aximiravo ala akina a wAmerika, ni aximwali ala a wAmerika? Exeeni enookhalihani oovirikanihaxa, munaamwi othene anyu muhimyaka wira mwa ‘aKristu’?”

Owo khwira, “Mulopwana, munnoona epantte nsuwa nle nintupweelaaya?”

Owo khwira, “Kinnoona.”

<sup>237</sup> Owo khwira, “Epantte ekina y’ephareya, estaatu emosa ya oNova Inklateera, epooma emosa ya estaatu yeeyo, ni empa emosa epooma yeeyo, ookhala mwali mmosa kimulaihenryaka wira kaamukhala oororomeleya wa yoowo.” Owo khwira, “Eyo ti yothene erinaaka mmuruni, omaliha osoma waka wa sooratta ni omutthikela mwali owo onkhala oororomeleya wa miyo.” Owo khwira, “Mwaha wa yeeyo kinkhalaaka enamuna enkhalaka.”

<sup>238</sup> Oh, munna mulopwana, muthiyana, nyuwo pooti otikinihiwa mwaha wa xeeni ehincalaahu etthu awo anniitthanaya. Miyo nkincala etthu awo anihimy’aya.

<sup>239</sup> Miyo kaarimweemela ni Fred nihiku nlo, oSan Juan wu, oPorto Rico, naaweha ephareya, ni kaahiwerya oweha ottaiwene, epantte ele ya maluku a mphareya, voorakama emiilya nuusu,

mawipi ale maalupale avenyaka. Owo khwira...Akholonko yaamweettasa mmatta, siiso. Miyo khwira...Owo khwira, "Munna Branham, ela eri ntoko Erimu."

<sup>240</sup> Miyo khwira, "Masi ephareya enrowa okhala yoomaala iwe, munna." Miyo khwira, "Epantte ekina y'ephareya wu, nookhala nipuro nimosa nniihaniwa Wirimu, ookhala Mmosa oniihaniwa Yesu, Wirimu wenna, nihiku nlo Owo ookuxa itampi saka sothene. Ni miyo koommanela natiri wira kaamukhala oororomeleya wa Yoowo, kaamwiira itthu Owo onthunaawe wira kiire. Mwaha wa yeeyo kihinuuleliwaaka muru Ehapari yooreera Awe, Ti Owerya wa Muluku wo woopola." Ti yeeyo enimwiirihani muKristu okhala voovirikana. Owo t'ovirikana okhala wira ookhalana Etthu wira akhaleke oovirikana.

Nrowe nuurame muru okathi vakhani paahi.

<sup>241</sup> Mpatthani aka oovolola, voosiisu ula, mookhalana etthu yoovirikana yo okhalela, etthu wira yookumiheni molumwenkuni, etthu emosa enihimyaxa etthu wa nyuwo ovikana olumwenku wothene, okhanle omukhalela Kristu? Mwaahikhalane yeeyo, muhinaakhelela-ni Yeeyo vano. Muhirowe okereja paahi ni wira, "Kintthuna kikhale mutthu ooreera murima." Muhiire yeeyo. Muntthuna okhala muKristu. Nyuwo, yaakhanleene etthu okathi wothene enkhalana mmurimani mwanu, yooleelakani, "Nyuwo khamukhanle oratteene, masi kintthuna wira mukhale oratta-ene." Nyuwo okathi wothene munniphavelaka okhala etthu muhikhanly'anyu vano, khamunsuwela wira owo Muluku oniwiihanani? Muhirowe ettuli. "Maana vakhala wira mwaahinto omwaleeliwa ni khukhalana okathi, nto khukhootta emaara yookiserya, khuwaavo-tho mukuttho mukina wa etampi." Muhirowe ni Esawu.

<sup>242</sup> Murwe ni Yakope, voohicala e...voohicala etthu xeeni enrowa otthuneya wa nyuwo. Vakhala wira entthuneya etthoko anyu, vakhala wira onthuneya muteko anyu, vakhala wira antthuneya aiy'anyu, antthuneya amwaar'inyu, vakhala wira antthuneya an'inyu, yatthuneya etthu p'itthu, mphwanye eyuulupale! Ti yeeyo entthuneya. Ni moonakaruru siiso, voosiis'ula, ni wira mwaanitthuna okhalana ehaakhi y'eyuulupale ela! Nkinwerya woovahani. Muluku t'onwerya, ni Owo ti Ole onlavula ni nyuwo. Munnitthuna ovenxa ntata paahi, wira, "Mukivekelele, Munna Branham. Eyuulupale eyo, kinnitthuna." Muluku ooreeriheni, mapuro othene. "Eyuulupale eyo, kinnitthuna."

<sup>243</sup> Tith'ihu a Wirimu, kinnooxukhuruni Nyuwo, Muluku Oosuwanyeya ni Oowaarya, mwaha wo waareerela Wanyu murima wothene ni waamorela ikharari aana alopwana n'athiyana a etthu. Ni ninnisuwela wira niri okathi wookiserya, khiivo etthu enwerya okhala-tho. Ninwehererya paahi okathi wo

woolihiwa; ntoko saary'aya mahiku a Nowe, ovilela wa Muluku, okathi ekalawa yaatekiwaaya, okathi athu athanu n'araru yooponwe aya. Nyuwo muhimmeye wira, "Siiso enookhala orwa wa Mwaana a mutthu. Muluku t'ovilela, ahitthunaka wira akhale mutthu onipweteya, masi wira othene aphiyerye orukunxa murima."

<sup>244</sup> Ni olelo mpaani mu, aakhala alopwana n'athiyana avenxale matata, amiravo n'axirushi, amiravo n'atokweene, avenxale matata, yiiraka, "Yookhala Etthu enikipurula." O Muluku, awo ahikhootte Eyo. Awo atumihe osoma waya, atumihiwe sothene arinaaya. Ntoko mulopwana aaphwannye nluwu noowaarya nuulupale; naari noosuwanyeya, nluwu noowaarya nuulupale, naari nluwu noowaarya noowunnuwaxa, vano owo khutumihale othene awawe makhaani, wira awerye othuma nla noosuwanyeya, nluwu noowaarya nuulupale. Awo atumihe sothene arinaaya sa molumwenkuni, voosiis'ula, osuweliwa waya wothene wa molumwenkuni.

<sup>245</sup> Athiyana ala akilaanthe va, Pwiya, anci-ene aya yiiwale Ehapari yooreera olaileiwa imaara sinci-ene, ni nlelo aneetta mmwe molumwenkuni, ni othara ethoonyeryo ya molumwenkuni ni owara ntoko olumwenku, ni orowa mmeerani ni itthu sa molumwenkuni, aniira mpantta wa itthu sa molumwenkuni ni wiira ntoko olumwenku, ni erumeelaka itthu sa molumwenkuni. O Muluku, awo yuuliwe muru, voosiis'ula. Naakhanleene nrromelo mwa yaawo, Pwiya, mutaphule olelo. Mutthuniherye okhale okathi yoola.

<sup>246</sup> Ni axilopwana ala va, Pwiya, O Muluku, mwaamorele ikharari. Anci-ene a aya nlelo aneetta mwa itthu sa molumwenkuni, nlelo atthunaka ni epuhaka itthu sa molumwenkuni, etampi, onvura sikaro, owurya, soowurya s'opatthani, saravexa imaara kamosa-kamosa, wala—wala etthu ntoko yeeyo, wala okhalela ithaama, ni ipaphelo sikhaani, sa aximwali awanre-ene voochifayi. Ni irutthu iye awo anwehaaya mphironi, ni anihalelaaya waaphita atthu mwaha wo owehaka seiyo, yiisiihanaka aKristu.

Ni osuwela wira ekhalele ele ya erutthu ya muthiyan'owo, khino mwa iwoora miloko miili ni xexe, enrowa okhala yinttaka mmahiye, axikokho ni axiitthu apuruleyaka mmitikani mmo ni ekhalele ya erutthu awe; nto munepa awe wu omooroni wa xetwani, mwaha wa enamuna aakhalaawe. Ni, nnakhala vo, owo oonihaka iyano sawe sikhaani, soopintariwa, ni onyemulakani ni ootheyakani.

<sup>247</sup> Muluku, mwaamorele ikharari atthu awo. O Pwiya, muhaahiye apweteyaka. Xontte mmoriwe ikharari ni nveleelihe omoriwa ikharari. Munvahe khula mmosa a awo, Pwiya. Nyuwo ti Mmosa paahi onwerya ovaha eparakha yeela. Ni vakhala wira Nyuwo moowiihanela Ekumi Ehinimala, mirima saya

sitthukuwe; ni awo ahiye itthu sothene epantte aya voosiis'ula, vano nto yaakhele. Munivahe, Tithi.

248 Nto vano Erooho Yoowaarya erwe vamuthukumanoni va, wa aretta n'ale ooxanka, ni yaatthuniherye atthu yoone wira Mutthak'ola woolaleeriwa voosiis'ula, wira Orwa n'itthu sothene siri woomalelani, ni hata Yesu avaraka muteko muKereja mw'Awe. Mutthuniherye wira yiireye naanaano va, Pwiya, Nyuwo mwaakuxe atthu ala mmatatani mw'Anyu. Nto awo yoonaru Erooho Yoowaarya evaraka muteko, yeettaka eriyari y'atthu, elipihiwe, Mutthaka kilaleiye aka, wira niri okathi wa woomalelani. Ni awo yiwe. Awo ahiwa, ni esuwele wira Yesu yoowo mmosaru, enamuna Owo iiraly'awe nihiku Nawe, Owo ori vaava airaka mwa Ekereja Awe mahiku ookiserya. Vano nto awo yiire, evahaka ikumi saya ni irutthu, ni minepa ni irooho, wa Yoowo. Miyo kinnaavaha wa Nyuwo, Pwiya, mwa Nsina na Yesu.

249 Vano, mpaani mwemmo atthu ary'aya, koomuruma Billy voosiis'ula wira okawe ittikitti sa mavekelo. Owo . . . [Nipuro vahiitthu mufiitani—Mol.]

250 Munoowereiwa, muroothoiwa? Muluku akuupululela, ntoko Owo saamwiireny'awe muthiyana veehimeni, ni okileela muxankiho anyu, wala etthu mwaha wa nyuwo, munsuwelaamyu wira nkisuwenle, yaamookhalihani waamini wira mmwaamini Muluku? Yaamuwirihani akina wa nyuwo okhalana waamini? Ola muthukumano ahu woopacerya? [Munna muthiyana oniira, "Nnari."—Mol.] Oh, nyuwo mootoko okoona, masi miyo ka mmalapo wa nyuwo. Eyo ekeekhai? Vaareera, Apwiya Muluku yoovaheni envekelanyu.

251 Vano, ti y'ekeekhai, wala nnari? Oh, wulu! Nvekele etiini anyu y'otthokelela. "Pahali," iirale, "ori vayi owo?" Eliya Omwaako Karmelo, iirale, "Ori vayi Pahali? Vayi? Munvenxe." Khamurina y'omuvenxa Yesu. Owo t'ovenya okathi wothene. Owo onnikhala voohimala, mukumi voohimala, oowerya voohimala; mmosaru nsana, olelo, ni mahiku othene. Amen. Muluku onkhala Muluku.

252 Munnaamini wira mukattyamiho anyu wa murima onoorowa woohiyani ni munoorowa okhala mukumi? Nyuwo khamuhiyo a wenna. Mutthikele oLexington mwaaleele atthu itthu suulupale Apwiya awiirenyayani. Munnona?

253 Eyo ennivira vamuru v'atthu, ahinvaraka. Ekereja ekumi enoovara eyo, naanaanoru, ni osuwela wira Mukhalelo wa Erooho Yoowaarya ori vaava.

254 Ookhala mutthu ottuli nno ovenxale ntata. Mwaari nyuwo, muxano? Munnaamini wira Muluku onniwerya okileela muxankiho anyu? Mutokweene . . .

255 Munna iwe wookiseryani, kookupali wira owo oohimya, okathi vakhani ovinre, wira . . . Munnaamini, munna? [Munna

oniira, “Ayo.”—Mol.] Munnaamini? Vano mukattyamiho owo wa esapala onimoohiyani, munookhala saana. Munnaamini? Nyuwo munnikupali eyo okhala ovonihwiwa? Nvenxe ntata, wira munnikupali. Munnona? Uh-huh. Vaareera. Owo mmalapo wa miyo. Nyuwo moosuwela eyo, Pat.

<sup>256</sup> Muhano mmosa onweha vale, avekelaka, oookiweha, khuhimya wira aari mmalapo. Munnaamini wira ikuru sa ephome sinimoohiyani? Ti yeeyo, kehiyo? Nvenxe ntata yaakhanle-ene ekeekhai. Vaareera, mmwaamini Muluku.

Munnoona enihimy’aka?

<sup>257</sup> Ankhi akina wa nyuwo atthu munkisuwela? Mookhalana etthu vamurimani vanyu. Nvenxe ntata. Anci-ene a nyuwo! Nkinwerya wiirha; Ehaana orwa paahi. Moosuwela, onkhala waamini wanyu.

<sup>258</sup> Georgie Bruce, kinnimoona okilaanthe vale. Nyuwo okathi wothene munniphavela ophwanya etthu mwaha wa mutthu, Georgie. Nyuwo moovonihwiwa, kankuru. Khuwaavo ohoverya mmuruni mwanyu. Nihiku mwaarwiye anyu etapernakulu ila khukhuma mukhor’ole vale, Erooho Yoowaarya khukirweela, ni khooleelani vaavale vale yowiira hata mutthu ahaasuwenle molumwenkuni woohikhala nyuwo Muluku ni mutthu mukina. Eyo ekeekhai? Ti yeeyo. Nyuwo munnikaamini, kahi siiso, Georgie? Mookhalana etthu vamurimani vanyu, Georgie. Munnaamini wira Muluku onniwerya okileela eri vamurimani vanyu?

Eyo yaamuwaaminihani, nyuwo atthu akina, munkisuwela?

<sup>259</sup> Kinnimusuwela George, masi owo onuupuwela etthu. Owo ookhalana atthu aili, ahikhanle vaava, owo onaavekelelaawe. Oowaili aya ankhala oCorydon. Ti yeeyo. Ni ookhalana mutthu va, mulopwana owo oninkelelaawe, ori nno oxipiritali. Nto nyuwo munoovekela, kahi vanci-enexa ovonihwiwa wawe, masi woopowa wa munepa awe. Eyo ti SIISO ANIHIMYA T’APWIYA. Ti yeeyo. Eyo ekeekhai, Georgie? Eyo ekeekhaii volikana.

<sup>260</sup> Mutthu mmosa ottuli iwe oovenxa ntata, ottuli iwo, ottuli saana, ottuli nno. Nyuwo, ankhi nyuwo? Mwaamovenxa ntata, nyuwo mwa mmalapo wa miyo? Mulopwan’ola okilaanthe va okiwehaka miyo, miyo nkinoosuwelani. Munnaamini wira ka profeta a Muluku, murumeyi a Muluku? Munnaamini Erooho Yoowaarya, wira koohimenryakani Ekeekhai? Munnaamini Yeeyo? [Munna oniira, “Ayo.”—Mol.] Mwaamini-ru, nyuwo muhaana o-. . .eyo t’itthu emosa paahi murinaanyu, okhala wira munihaaxeya ni kankuru. Ti yeeyo. Nyuwo khamuhiyo a epooma yeela. Nyuwo mwa a oNew Albany. Ti yeeyo. Ni murina kankuru. Mwaamini-ru ni murima wothene, munookhala mukumi. Munookupali? Nvenxe ntata. Attotopeliwe Apwiya.

<sup>261</sup> Kookupali, wira muthiyan’ole vale owanre exapheyo yootteela mmuruni mwawe, muhano ooriipa, oovenxa ntata.



Nkinakhalane mutthu ooripa nlelo. Nyuwo munnaamini, muhano? Vaareera, mulopwana, mwaamini ni murima wothene. Murina eretta ya murima, mukattyamiho wa mmirimani, mikattyamiho. Ookhala ooruhale ni va voosis'ula. SIISO ANIHIMYA T'APWIYA. Ti yeeyo, kahi siiso, muhano? Yaari ekeekhai, muvele nleso nlo murinaanyu mmatatani mwanyu, vano athu yoone. Miyo nkinatoko omoona muthiyan'ola kookhalaru.

<sup>262</sup> Moovenxa ntata? Miyo ka mmalapo wa nyuwo? Ni nyuwo mmalapo wa miyo. Munnaamini wira Muluku onnisuwela, ahiiso Muluku onnoosuwelani? Munnaamini wira Owo onniwerya okileela eri vamurimani vanyu? Nyuwo muninvekelela mutthu. T'atithi anyu, arina muxankiho wa murima. Ti yeeyo. Ni nyuwo mumphavela opatiiso wa Erooho Yoowaarya. SIISO ANIHIMYA T'APWIYA.

Mwaaweryaka waamini!

<sup>263</sup> Ankhi mwaamuthiyana orina ntata nawe osulu so, munnaamini? Mukattyamiho anyu nlepa mmatatani mwanyu. Masi nyuwo muninvekelela musulu anyu. Ti yeeyo. Mwaana khokhanle saana. Eyo ekeekhaii. Kehiyo, muhano? Munnaamini ni murima wothene, wa yeeyo.

Okathi wiiralyaka, "mwaana." Nwehererye minuutu mmosa. Oh, eyo vo. Mwan'inyu aaphwanye ehasara ya ekaaro; oorakala. Miyo nkinoosuwelani, muhano, masi eyo ekeekhaii. Yaari ekeekhai, nvenxe ntata.

<sup>264</sup> Vano, T'ani ori va? T'ani Uwo? Nkihiyo miyo. Kinwerya sayi wira yeeyo? Muhikhale oowuuma murima wa Erooho, Itthu sa erooho. Ti Muluku va! Erooho Yoowaarya yeeyo entthunaanyu, munnaamini Yeeyo vano? Munnaamini Yeeyo vano? Vaareera, nto mwaakhele Yeeyo vano. Vano p'ukathi wo waakhela Yeeyo. Mwaamini ni murima wothene.

<sup>265</sup> Nyuwo munwereiwa wala muthoiwale. Miyo nkinwerya ovoniha. Khaavo mutthu onwerya ovoniha. Nkinwerya ovaha Erooho Yoowaarya. Masi Ole onwerya ovoniha ni ovaha Erooho Yoowaarya, Owo ori vaava. Owo ti Ole oniira.

<sup>266</sup> Vano muuramihe miru sanyu. Nyuwo mwaamini naanaano va, okathi onoovekelelaakani ni maleeso ala.

<sup>267</sup> Tith'ihu a Wirimu, ntoko sinsuwelaaka, miyo koovira mwa athu othene ale yaari amalapo, mpakha woonalyaka wira kaari oowoocya ni oolosowa; koono weettiheriwa wira ola okathi khino Oothanliwa oonalyawe. Khula mmosa a awo, Pwiya, yihaniwe ni atthuniheriwe wihaniwa ni Erooho Anyu; ethu emosa, waamini waya, awo yaahikhalana waamini wunci-ene (akina aya) ovikana supuwelaaya wira yaahikhalana. Awo apacenyere mmurimani mwaya.

268 Ni muthiyana aahikwannya nlaya Nawe emaaara emosa okathi owo aaviraawe, vano Owo khurukunuwa khwira, “T’ani okikwanyale?”

Nto awo khwira, “Ahe, atthu othene ahookwanyani.”

269 Owo khwira, “Masi kinnoona wira kootteettheya.” Vano Owo khumphwanya mwaamuthiyana khimuhimeerya wira aahikhalana ovuuva ephome, ni wira waamini wawe waahinvoniha.

270 Ni Bibilia ohimnye, wira, “Owo nlelo Namukuttho Muulupale, olelo, onwerya okwanyaniwa ni ewereyelo sa iretta sahu.” Yooempwa ehimnye wira, “Owo mmosaru nsana, olelo, ni mahiku othene.” Nto vakhala wira Owo mmosaru, ni Namukuttho Muulupale mmosaru, Owo onimwiira vamosaru ni onoopaka vamosaru.

271 Ni atthu yoone wira Ekereja yoosareya Erooho enrweela muru. Kristu ohanle orwa okuxe Ekereja Awe. Ithoonyeryo sawe suulupale sookiserya, ntoko saary’aya mahiku a oSotoma; Yoowo aalavunle, aamusuwela Saara, ni aasuwenle wira owo aahikhalana mwaara aaihaniwa Saara, aasuwenle wira owo aahithey muheemani; Owo khwira, “Eyo enrowa okhala ethoonyeryo. Moonaru yeeyo, muupuwele, nloko nlo khaninvira mpakha sothene omaliheriwa.” Ela eri va. Hiyo nri woomalelani.

272 Munivahe, Pwiya, wira khula mutthu onwereiwa mu asuwele wira Yesu Kristu mukumi ori vaava. Maleeso ala areeriheliwe khula erutthu enwereiwa awo anrowelaaya. Miyo kinnimpwapwela xetwani, mwaha w’atthu. Miyo kinnimoomola, ni Erooho ya Muluku, mwa waamini, miyo kinnomoomola khula ohoverya. Wira khula mutthu va, otthomeliwe Ekumi Ehinimala, aakhele Eyo okathi ula. Khula mwiikho, khula ekhwilyu, khula etthu yaamukhaani ya molumwenkuni, khula muritti mwaamukhaani, ntoko Bibilia sihimaly’awe, “Nrowe nihiye miritti sothene, ni etampi ennirukurerya vookhweya-vo; wira nitthimakele, n’uvilela, muteko oheliwe ohoolo wahu; niwehaka” (exeeni? kereja? mutthenkeso?) “Mwaneene ni Namamaliherya waamini wahu,” yoowo ori vaava naanaano va, “Yesu Kristu, Mwaana a Muluku.” Ninwehaka Ole... Hiyo khanirina okupaliki moolumo ninsuwelaahu wira ekeekhai, masi nnakhala vo Masu awo annikhalihwi ekeekhai wa hiyo voosiis’ula. Yesu yoowo okhwiiye, khokhwiiye, Owo oohihimuwa, nto miyaakha ikonto piili ohoolo waya Owo oniruuha Ekereja Awe omuruni. Erooho ya Yuta envara muteko eriyari aya. Masi awo ahiye epantte aya khula nluku nookwattula ni sothene, okathi ula, ni emwaakhele Yoowo.

273 Awo yiiwe, yeeyo yiiwalyaya, mmutthakani. Awo esuwele vano wira Masu ene yaawo yiiwalyaya ahooniheriwa, ni awo asuwele Eyo, wira Owo ti Kristu. Nto vano awo yiire, yiire voolikana ni Yaawo: yaakhele Yaawo, ni evenye yeemele, ehimye

onamoono; ni avolowe Moomweneni mwa Muluku, esarihiwaka Erooho Yoowaarya.

<sup>274</sup> Aretta evonihiwe. Wira ale ooxanka avonihiwe. Khula etthunelo ya murima ekhalihwe yooreera. Munivahe, Muluku Oowerya sothene.

<sup>275</sup> Vano muuramme-ene muru, mirima sanyu sootthukuwa, mwiivahererye okathi wa mavekelo; okathi vakhani ohinatthi, wona waka, muteko w'opatiiso onoorwa, ehinatthi ela. Onookhala muteko mukina ohiy'ula.

<sup>276</sup> Vano, muupuwele, muhihiye okathi ola ovira. Kookhala va vano ntoko iwoora piili ni nuusu, wala soovikana, kiphavelaka okuxa okathi aka, n'uruuha Ehapari yooreera, ni owooniherya voolikana. Nto nimphiya nilukamaka woomalelani. Ni yoosoma yeeyo: wiiwa, osuwela, wiira. Muhihiye woovirani vamuru. Nyuwo muhiwa Eyo. Nyuwo munnisuwela wira Mukhalelo Awe ori vaava? Moosuwela wira Ti Yoowo oniiwiihanani? Vano mwiire voolikana ni Yeeyo. Muluku akhale ni nyuwo. Mukhalane okathi wa mavekelo.

<sup>277</sup> Munna Neville, murwe, okathi vakhani, mmavekeloni, mwaaweryaka orwa va.

Munvarele paahi. 

60-0221 Wiiwa, Osuwela, Wira  
Voolikana Ni Masu A Muluku  
Branham Tabernacle  
Jeffersonville, Indiana wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyuwe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)